


藏書紀事詩卷二

長洲葉昌熾



海上小山壓大山大山力比小山孱穹廬未可藏書卷望海
堂中誓不還

東丹王倍

遼史東丹王倍小字圖欲太祖長子也幼聰敏好學太祖
破渤海大誣譏改其國曰東丹以倍爲人皇王主之建元
甘露後讓位德光德光旣立見疑以東平爲南京徙倍居
之置衛士陰伺動靜唐明宗聞之使人跨海持書密招倍
倍立木海岸刻詩曰小山壓大山大山全無力羞見故鄉
人從此投外國攜高美人載書浮海而去唐明宗賜姓東
丹名慕華復賜姓李名贊華倍初市書至萬卷藏於醫巫

閻絕頂之望海堂通陰陽知音律工遼漢文章嘗譯陰符
經善畫本國人物 謝啟昆詩建國東平恨徒居數峰拳
石壓穹廬大山無力乘桴去望海堂中萬卷書 志雅堂
雜鈔王介石有東丹王贊華所畫番部行程圖道君題云
世所謂東丹王者也所畫絕妙與王子慶西域圖相伯仲
昌熾案元耶律楚材東丹王之八世孫著湛然居士集
其子鑄著雙谿醉隱集漠北世家專精文學鮮有能過之
者未始非醫巫閻萬卷爲之貽謀也王爲五季時人但遼
史有傳斷代仍宜從遼次於宋後

女几三潭憶避兵遺簪敗履不勝情金源文獻空山在野史
亭前夜哭聲 元好問裕之

郝經遺山先生墓銘先生以金源氏有天下典章法度幾
及漢唐國史實錄在順天道萬戶張公府願爲撰述乃爲
中州集百餘卷又爲金源君臣言行錄往來四方采摭遺
逸有所得輒以寸紙細字親爲紀錄至百餘萬言捆束委
積塞屋數楹名之曰野史亭先生諱好問字裕之太原定
襄人登興定五年進士天興初入翰林知制誥金亡不仕
而卒 劉靜修詩百年圖籍有蕭相一代英雄誰蔡公策
書紛紛少顏色空山夜哭遺山翁自注汴亡張蔡公以金
實錄歸遺山嘗就公膳錄 遺山故物譜予家所藏書宋
元祐以前物也貞祐丙子之兵藏書壁間得存兵退予將
奉先夫人南渡河舉而付之太原親舊家自餘雜書及先

人手寫春秋三史莊子文選等尚千餘冊并畫百軸載二鹿車自隨是歲寓居三鄉其十月北兵破潼關避於女几之三潭比下山則焚蕩之餘蓋無幾矣往在鄉里常侍諸父及兩兄燕談每及家所有書則必枚舉而問之如曰某書買於某處所傳之何人藏之者幾何年則欣然志之今雖散亡其綴緝裝褙籤題印識猶夢寐見之或曰物之闕人多矣世之人玩於物而反爲物所玩貪多務取巧偷豪奪遺簪敗履惻然興懷者皆是也李文饒志平泉草木有後世毀一樹一石非吾子孫之語歐陽公至以庸愚處之予以爲不然三代鼎鐘其初出於聖人之制不曰豕用享則曰子子孫孫豕寶用豈聖人超然遠覽而不能忘情於

一物耶蓋自莊周列禦寇之說盛詎者以天地爲逆旅形骸爲外物雖聖哲之能事有不滿一笑者況外物之外者乎丙申八月二十有二日洛州元氏太原房某引

開卷鬚眉一笑同道人舊住水晶宮寶書轉展歸天上空自傷心到牧翁

趙文敏孟頫

明李維柱本石

式古堂書畫攷元趙孟頫字子昂號松雪又號鷗波水晶宮道人宋司戶參軍入元官至翰林學士承旨贈魏國公諡文敏 七頌堂識小錄宋板書所見多矣然未有踰前漢書者於中州見一本出王元美家前有趙文敏小象陸師道亦寫元美小象於次帙標籤文衡山八分書 天祿琳琅漢書宋刻本王世貞跋云余平生所購宋本班范二

書尤爲諸本之冠桑皮紙白潔如玉四旁寬廣字大者如錢有歐柳筆法細書絲髮膚緻墨色精純前有趙吳興小象又錢受之跋趙文敏家藏前後漢書太倉王司寇得之吳中陸太宰家余以千金從徽人贖出藏弄二十餘年今年鬻之四明謝象三牀頭黃金盡生平第一殺風景事也此書去我之日殊難爲懷李後主去國聽教坊雜曲揮淚別宮娥一段淒涼景色約略相似又云吾家藏書盡爲六丁下取此書卻在人間武林坦公司馬攜以見示嗚呼佛言昔年奇物經歷年歲忽然復覩記憶宛然皆是藏識變現良非虛語又云景山李維柱字本石本甯先生之弟也嘗語余若得趙文敏家漢書每日焚香禮拜死則當以

殉葬余深愧其言昌熾案文敏漢書今歸天府以上諸跋藏弄源流釐然可攷故詳錄之又元本大廣益會玉篇趙孟頫藏本有水晶宮道人印孟頫以湖州四面皆水自號水晶宮道人解縉春雨集云文敏早年喜畫梅印以水晶宮圖書浙中有瑪瑙寺或戲以爲對遂不用張應實清祕藏論書畫印識云趙字方圓二印大雅印天水趙氏印竝趙孟頫陳繼儒讀書十六觀趙子昂書跋云聚書藏書良非易事善觀書者澄神端慮靜几焚香勿捲腦勿折角勿以爪侵字勿以唾揭幅勿以作枕勿以夾刺隨損隨修隨開隨掩後之得吾書者并奉贈此法暴書雜記汲古影寫許棐梅屋詩稿第四卷後有朱文方印云趙

文敏書卷末云吾家業儒辛勤置書以遺子孫其志何如
後人不讀將至於鬻頽其家聲不如禽犢若歸他姓當念
斯言取非其有死甯舍旃凡五十六字

博進新償十萬緡隋珠爲燭蠟爲薪江南空有求書詔故紙
原難換告身

莊肅恭叔

松江府志莊肅字恭叔號蓼塘居青龍鎮仕宋爲祕書小
史宋亡棄官浪迹海上性嗜書聚至八萬卷手鈔經史子
集下至稗官小說靡所不具書目以甲乙分十門至正間
修宋遼金史詔求遺書危素購於其家得五百卷輟耕
錄蓼塘既沒子孫不知愛惜或爲蟲鼠蝕齧或爲鄰識盜
竊或供飲博之需或應餽覆之用編帙散亂所存無幾至

正六年詔求遺書有以書獻者予一官江南藏書多者止
三家莊其一也繼命危學士素特來選取其家恐兵遁圖
讖干禁悉付祝融其孫羣玉收拾燼餘覬領恩澤宿留日
久仍布衣而歸書之不幸如此五茸志逸元文宗時經
筵語及唐聶夷中詩詢其有文集否諸學士以未聞對或
言莊氏富藏書特旨訪其家果有聶集上之敕授教授

楊瑀山居新語上海縣士人莊蓼塘者藏書至七萬卷其
子欲售之買者積年無有好事者可見其鮮

嗚咽江頭變徵聲銅山傾處洛鐘鳴趙家已是無完土樓上

遺民擁百城

張雯子昭

鄭元祐張子昭墓誌張雯字子昭其先浚儀人祖父世居

吳雯少嗜學時宋社已屋三十稔矣故老遺黎猶有存者
子昭從其人問宋遺事得其什一喜游錢塘山川城邑徘徊
躑躅感歎不能已兼通聲律家臨市衢構樓蓄書自經
傳子史下逮稗官百家無不備日緝閱研究年六十四卒
於至正十六年十一月子田次子里孫男一名肯昌熾
案以至正十六年上推子昭之生尚在宋咸淳之季應次
莊肅之後杭州府志雯南渡居錢塘精律呂每眾坐聞
樂輒俯首頷蹙曰吾其不免乎子田字耘已亦工文詞田
子肯字繼孟一字寄夢從宋濂學昌熾案蘇州府志雯亦
有傳藝文類書畫記補遺繼潛錄墨記皆雯撰觀鄭元祐
所撰志雯實吳人特嘗寓於錢塘耳又案天祿琳琅說

文解字有子昭印據嘉興府志以爲盛懋字子昭非是亦
雯所藏也 鐵琴銅劍樓書目簡齋外集卷首有張子昭
印朱記

荒江寒雪釣潛蛟一葉煙波不繫匏載得筆牀茶竈去箒鏡
怪牒寫元包 袁易通甫

黃潛靜春先生墓誌銘君諱易字通甫曾大父璉築室長
洲之蛟龍浦君不樂仕進所居西偏爲堂曰靜春左江右
湖禽魚飛泳於煙波莽蒼間堂中有書萬卷悉君所校定
客至輒斂卷與縱飲劇談留連竟日 楊載靜春堂詩集
序通甫有宅在郡城東南二十里蛟澤之濱蛟澤當吳淞
江之下其水甚深 陸文圭跋袁靜春詩具區甫里之間

近世有隱君子焉結茅構亭出蒼莽之墟樵村漁舍混爲一區城市之跡疏而麋鹿之性馴嗜欲之機淺而鷗鳥之情親所交皆畸人逸士西鄰北里詩筒往來清江白月舉樽相屬優游不仕者四十餘年 四庫提要靜春堂集四卷元袁易撰易居吳淞具區之間築堂曰靜春聚書萬卷或棹舟載筆牀茶竈古器游於江湖趙孟頫嘗爲畫臥雪圖稱易與龔璠郭麟孫爲吳中三君子

祠祿難言領洞霄一枝避迹等鷓鴣欲知梅礪藏書窖甬上南湖學士橋

袁文清梅

四庫提要延祐四明志十七卷元袁梅撰梅字伯長慶元人宋知樞密院事詔之曾孫少爲麗澤書院山長以薦改

翰林國史院檢閱官累遷侍講學士卒贈江浙行省參知政事諡文清所著易說春秋說世久無傳惟清容居士集及此志尙存 至正直記袁伯長學士承祖父之業廣蓄書卷國朝以來甲於浙東伯長沒後子孫不肖盡爲僕幹竊去轉買他人或爲婢妾所毀者過半 全祖望湖語淵然清容不振剡源遺老之幟而牙籤之於王氏亦復竝峙彼津逮者蓋未易以猝詣自注南湖藏書前王後袁 又胡梅礪藏書窖記南湖學士橋清容之故居也其東軒有石窖焉予過而歎曰此梅礪藏書之所也宋亡遺老避地來慶元者多先生館袁氏注通鑑成編而已丑寇作以書藏窖中得免

家世何嫌賣布翁圖書研北自玲瓏豹胎熊掌兼珍味豈獨
蝼蝸薦水蟲

吳郡陸君

陸友友仁

黃潛陸氏藏書目錄序吳郡陸君居闔閩中四壁之外輒
與賈區直君殊不以爲溷一榻蕭然環以古今書凡若干
卷自經史傳記下至權謀數術汜勝虞初旁行般若百家
眾技之文櫛比而鱗次入其室如登羣玉之府而採蓬萊
道家之名山忘其爲居之隘也君旣第其篇帙部分類別
爲之目錄以便覽者且屬予使序之夫稻粱稷黍魚肉果
蔬人所資以爲生養之具不可一日缺者也得之足以飽
而不足以極天下之味言珍異之味至豹胎猩脣封熊之
躡可以爲美也而非可常致以給朝夕之須彼水草小蟲

蝟范蝼蝸野果之實人所易致而未必皆知好其味也世
蓋有嗜書若嗜飲食者顧所嗜之不同而有不可得兼耳
君其兼而取之者耶老子曰五味令人口爽好奇之士苟
游於君而獲其所嗜焉染指而出足矣尙無以秦人之炙
易吾之炙也哉 古夫子亭雜錄大名門人成文昭字周
卜寄陸務觀南唐書宋槧本也凡十五卷與今刻十八卷
編次小異前有陸友私印陸友仁印燕處超然印 昌熾
案陸友卽撰墨史及研北雜志者 四庫提要稱友字友
仁亦字宅之平江人徐顯稗傳載友仁生市廛闔閩間父
以市布爲業獨能異其所好攻苦於學博極羣物自號研
北生著研史墨史印史杞菊軒彙所言與黃文獻記悉合

則陸君之爲友仁無可疑者仍兩列之以示闕疑
愛書癖亦等憐才擁篲分庭事郭隗未有千金求駿骨望諸
何日自齊來 景春沈君

爾宋樓藏書志嘯堂集古錄千文傳跋景春沈君居樂園
坊與余同游可邨賀先生之門平生寡嗜欲惟酷好收書
有別業在閩門西去城僅數里景春昔嘗居之人有挾書
求售至必勞來之飲食之酬之善價於是奇書多歸沈氏
集古錄其一也昔人有以千金市馬者得駿骨予五百金
踰年而千里馬至者三景春嗜書何以異哉元統後元十
一月

新市春風有故亭論思不但證松廳先求宋本書堂記再讀

清容藏室銘

蘇天爵伯修

張貞毅思明

四庫提要元朝名臣事略十五卷蘇天爵撰天爵字伯修
真定人由國子學生試第一釋褐授從仕郎蘇州判官終
浙江行省參知政事 又元文類七十卷目三卷蘇天爵
編天爵所著尙有松廳章奏春風亭筆記諸書於當代掌
故最爲嫺習 元史蘇天爵傳至正十二年以江浙行省
參知政事總兵於饒信卒於軍中年五十九 宋本滋溪
書堂記蘇伯修家多藏書習知遼與金故實且謂予昔吾
高王父玉城當國初自汴還真定置別墅縣之新市作屋
三楹買書數千卷歲久堂壞先人葺之且漸市書益之又
嘗因公事至江之南獲書萬卷以歸 袁桷蘇氏藏書室

銘趙郡蘇氏崇其書楹剖史雲章經緯有程靈根湛虛服
習粹精 元史張思明傳思明字士瞻其先獲嘉人後徙
居輝州穎悟過人讀書日記千言延祐三年拜中書參知
政事重紀至元三年卒年七十八思明平生不治產不蓄
財收書三萬七千餘卷諡貞毅

讀書種子魯東家油幕深嚴護碧紗祇補鞋幫黏醬甌可憐
片片女郎花 孔文昇退之 子克齊行素

開有益齋讀書志至正直記四卷元闕里孔克齊撰克齊
字行素一字靜齋至聖五十五世孫祖宗善爲建康路教
授父文昇字退之爲建康書掾因家岳山克齊贅於沈氏
憲司薦授黃岡書院山長召爲國史編修 至正直記吾

家自先人寓溧陽分沈氏居之半以爲別業多蓄書卷平
昔愛護尤謹雖子孫未嘗輕易檢閱必告於先人得所請
乃可置於外館晚年子弟分職任於他所惟婢輩幾人在
侍予一日自外家歸省見一婢執選詩演半卷又國初名
公束牘數幅皆剪裁之餘者急叩其故但云某婢已將幾
卷補鞋幫某婢已將幾卷覆醬甌予奔告先人先人曰吾
老矣不暇及此爾等居外幼者又不曉事婢妮無知宜有
此哉不覺歎恨亦無如之何矣 又先公嘗以十六字作
座右銘云甯人負我毋我負人甯存書種無苟富貴

溯峽舟輕灩澦堆黃牛灘畔載書同十家何惜中人產一擲

蹲鴟沃野財 蜀帥紐鄰之孫

少室山房筆叢豫章漫鈔云元至正初史官遣屬官馳驛求書東南異書頗出時有蜀帥紐鄰之孫盡出家資徧游江南四五年間得書三十萬卷溯峽歸蜀可謂富矣 又云隋文父子以天下之力收書僅三十七萬遂冠古今元邊帥子罄其一家之產驟得三十萬卷亦宇宙奇事然但欲其多而不計重複則在今甚不難顧正本不知幾何耳古今書籍統計一代前後之藏往往無過十萬統計一朝公私之蓄往往不能十萬所謂天之生財止有此數也況元時板本尙希又非文明之世紐氏子三十萬卷芟其重複政恐不能三萬耳

盡上九峰巖

倪瓚元鎮

明史倪瓚字元鎮無錫人家雄於貲工詩善書畫所居有閣曰清閼幽迥絕塵藏書數千卷手自勘定古鼎法書名琴奇畫陳列左右自號雲林居士 無錫縣志清閼閣在縣東南梅里鄉之祇陀里旁列碧梧奇石非楊維禎張雨諸人不得至焉 列朝詩傳瓚見俗士避去如恐浼至正天下無事忽盡賣家產推與知舊人皆竊笑及兵興富家盡被掠元鎮扁舟箬笠往來淮泖間人始服前識也 馬位秋窗隨筆余家所藏雲林自畫清閼閣題云家在梁谿寢底之里以泥水自閉柴門掩於白日藜牀穿而未起傳癖書淫聊以卒歲 式古堂書畫攷瓚號荆蠻民又號淨

名居士朱陽館主蕭閒仙卿雲林子曲全叟幻霞子如幻
居士滄浪漫士奚立朗立映又號倪迂初名珽 又李伯
時三清圖有蕭閒圖書蕭閒畫印朱記 王世貞跋元人
名跡雲林又自稱嬾瓚

泗北邨居舍外坡道人好事喫茶多有時山色水光裏自倚
洞簫和權歌 孫道明明叔 夏庭芝伯和

松江府志孫道明字明叔華亭人居泗涇博學好古藏書
萬卷遇祕本輒手自鈔錄築映雪齋延接四方名士校閱
藏書爲樂又造一舟曰水光山色徜徉南浦自號停雲子
嘗與陶宗儀共汎宗儀製詞道明卽倚洞簫吹之與權歌
相荅極鷗波縹緲之思 鄭元祐孫高士象贊引雲閒孫

高士明叔隱於其里九峰三泖之間讀書績學築草堂三
閒偃息其中故雖甚貧用前人苦志篤學名其齋曰映雪
手鈔書數百卷皆小楷齊截然自以爲無所用於世視田
野闌寂若將終其身於是全眞教主關真人號之曰清隱
處士 四友齋叢說孫道明家於泗涇乃一市井人也在
勝國時日惟以鈔書爲樂其手鈔書幾千卷今尙有流傳
者好事者以重價購之 汪異東雲閒百詠映雪齋云名
士頻煩折簡招讐書同坐夜迢迢水光山色秋江裏更譜
新詞入洞簫 張雨題孫明叔映雪齋詩生白定知虛室
妙殺青唯積古書多 學津討原刻封氏聞見記後有元
人跋云子素有藏書之癖凡親友見借者暇日多手鈔之

此書乃十五年前所鈔者至正丙申歲不幸遭時艱難烽火四起煨燼之餘尙存殘書數百卷今僻居深村賴以自適亦不負愛書之癖矣至正辛丑上元日重觀於泗北疑夢軒雲閒夏庭芝伯和父謹誌昌熾案鄭元祐停雲軒記松江夏頤貞自其上世已稱善人丙辰兵變室廬盡燬家人僅完以城北之泗涇有舊田廬也徙家居之未知伯和卽頤貞否讀書敏求記雲煙過眼錄有至正廿年夏頤鈔本頤下疑奪貞字又按孫先生晚歲寫書題跋皆有歲月見於諸家藏目彙而錄之以當先生之年譜可也菰里瞿氏藏閒居錄一卷末題識云至正十八年戊戌之秋七月旦日鈔於泗北村居之映雪齋又讀書敏求記自號錄一

卷至正壬寅華亭孫道明手鈔於泗北村居之映雪齋時年六十有六又愛日精廬藏書志北夢瑣言二十卷後有跋曰武林忻悅學家藏至正二十四年甲辰五月七日寫起至二十七日輟卷華亭在家道人孫道明識於泗北村居時年六十有八也又士禮居藏書題跋記衍極孫明叔跋曰至正二十六年歲在丙午鈔於映雪齋時年七十歲又詒宋樓藏書志玉峰先生腳氣集後有跋云錄於城南寓舍時吳元年歲在丁未臘月廿八日庚午華亭孫道明明叔父年七十有一又海昌查樞亭孝廉藏南部新書有先生跋云洪武五年歲次壬子仲夏九日乙卯在華亭集賢泗北村居且喫茶處寫畢清隱老人時年七十有六又

臨漢隱居詩話一卷宋魏泰道輔撰洪武九年丙辰映雪
老人寫於華亭集賢外坡草舍兩窗時年八十亦見錢氏
敏求記錢又云予見道明所鈔書不下數十種皆在崦嵫
景迫之年老而好學真炳燭之明也

翠竹清溪比若耶江心湧出馬駝沙築樓正在沙灘畔三字
新題泰不華

陳季模

鄭元祐藏書樓記維揚陳君季模家馬駝沙之上沙當揚
子江之心而百川之水悉匯焉既久於是至其子天鳳字
舜儀生有異稟自髫髻以至於冠惟理義是說惟圖籍是
耽君愛其子之嗜學也於是以其家舊藏書合新購而得
之者凡五萬餘卷築樓於居之東而藏書於樓之上樓之

前鑿池以瀦水其後萬竹森立都水庸田使白野泰公爲
篆三大字以揭之乞予爲之記曩杜徵君原父每道陳君
之賢今徵君已逝海內猶所稱尙則君之賢詎不信夫故
爲記於樓壁俾讀之者當知陳氏藏書之意不爲科名發
也不爲利祿設也蓋以爲反身窮理非誠有志於聖賢之
學者不足與語陳氏藏書之意也

一線驚濤逼麗譙西亭萬卷歎漂搖經衣史服何從見櫟下

生歌汴上謠

周定王櫛

朱睦㮮灌甫

明史諸王傳鎮國中尉睦㮮字灌甫鎮平王諸孫幼端穎
及長被服儒素覃精經學所撰有韻譜五卷學者稱爲西
亭先生 徵刻唐宋祕本書目朱睦㮮授經圖二十卷

千頃堂書目西亭中尉萬卷堂書目十六卷朱勤美編昌
熾案勤美西亭之子朱竹垞所稱孫侍郎耳伯與西亭之
子竹居交契竹居疑爲勤美字也 萬卷堂書目跋余宅
西乃游息之所建堂五楹以所儲書環列其中倣唐人法
分經史子集用各色牙籤識別經類凡十一易詩書春秋
禮樂孝經論語孟子經解小學凡六百八十部六千一百
二十卷史類凡十二正史編年雜史制書傳記職官儀注
刑法譜牒目錄地志雜志凡九百三十部一萬八千卷子
類凡十儒道釋農兵醫卜藝小說五行家凡一千二百部
六千零七十卷集類凡三楚詞別集總集凡一千五百部
一萬二千五百六十卷編爲四部人代姓名各具撰述之

下東坡子曰余垂髫時卽喜收書然無四方之緣不能多
見大梁又自金元以來屢經兵燹藏書之家甚少聞或假
之中吳兩浙東郡耀州澶淵應山諸處或寫錄或補綴蓋
亦有年所得僅此信積書之難也隆慶庚午八月中秋日
東坡居士睦樺書 明詩綜小傳灌甫周定王六世孫萬
厯初舉宗正有坡上集錢受之云灌甫年二十通五經中
年築室東坡之上取古人經解繕寫藏弄敘而傳之先是
海內藏書富者推江都葛氏章邱李氏灌甫傾貲購之起
萬卷堂諷誦其中汴亡之後漂蕩於洪流怒濤可勝歎哉
靜志居詩話世所傳萬卷堂書目不列卷數撰人非故
籍也予家藏有聚樂堂藝文志四冊俱詳列卷數撰人係

陂上鈔本 曹溶靜惕堂集有明宗室灌夫宗正爲之最
往孫北海少宰令祥符就其第鈔經注二百餘冊載歸京
師崇禎壬午賊決河隄書堂付之巨浸徒其目存耳 周
亮工汴上謠河決後民多有以書紙蔽體者詩云雲綃霧
縠經衣史服又煮書云煮奇字去黑水蹒跚老蠹魚蝸蝓
登土盞 天祿琳琅續編春秋經傳集解明周王構賜籍
有周府御書樓寶朱印

匡廬山前雲氣濃爲雲作囊密密縫氤氳宮闕白雲裏此是
西陽第幾峰 甯獻王權 朱謀埠鬱儀

明史諸王傳甯獻王權太祖第十七子正統十三年薨
明詩綜小傳錢受之云王博學好古諸書無所不窺志慕

冲舉自號臞仙令人往廬山之顛囊雲以歸結小屋曰雲
齋障以簾幕每日放雲一囊四壁氤氳如在巖洞凡羣書
有祕本莫不刊布 又朱謀埠字鬱儀甯獻王七世孫以
中尉攝石城王府事旣卒豫章人士私謚貞靜先生有根
園近橐 趙一清水經注釋附錄甯獻王諸孫曰石城王
奠堵奠堵諸孫曰石城鎮國將軍宸澤中尉宸澤之曾孫
也 列朝詩集小傳鬱儀著書百有十二種皆手自繕寫
未嘗假手小胥常詒書告余願盡出其藏以相飲助繕寫
經歲卷帙宏多餘千令爲余邑子屬以相寄令酒人也儼
其書而焚之至今念之猶有餘恨 明畫錄朱統銀字伯
壘號羣玉山樵石城王孫其父謀埠以著書名世銀承家

學復精於繪事 千頃堂書目簿錄類甯獻王書目一卷
四庫提要甯藩書目一卷不著撰人名氏初甯獻王權
以永樂中改封南昌日與文士往還所纂輯刊刻之書甚
多其目凡一百三十七種詞曲院本道家鍊度齋醮諸儀
俱附焉 張芳徵刻唐宋祕本書例中州之西亭豫章之
鬱儀兩王孫家藏與天府埒西亭所藏盡付黃流鬱儀之
書亦遭劫火

九師易是劉安授三爵詩能衛武監竊比河閒無愧色遺經
往往出山巖 晉莊王鐘鉉 靖王奇原 端王知焯 簡王

新填 秦簡王誠泳 定王惟焯

茶餘客話明代藏書周晉二府 天祿琳琅穀梁注疏晉
藩藏本朱謀埠藩獻記晉莊王鐘鉉憲王之子高皇帝曾

孫也正統七年以榆林王進封博古喜法書嘗令世子奇
原刻寶賢堂法帖今世傳書畫多晉府章卽其人也 又
唐柳先生集晉莊王鐘鉉藏本 甘泉鄉人橐跋明晉藩
刻元文類晉藩自太祖子恭王櫛始封太原當嘉靖十六
年丁酉長史馬朋作序時爲簡王新填嗣封之二年明史
諸王表端王知焯嘉靖十二年薨無子新填以新化王知
焯長子奉敕管府事十五年嗣封序稱志道堂先王殿下
刻文類未完我虛益堂賢王殿下仰承先王之統克紹厥
志先王當謂端王知焯也端王之祖靖王爲世子時嘗取
閣絳大觀寶晉諸帖益以所藏宋元明人墨跡爲寶賢堂
帖端王合刻文選文粹文鑑文類文衡簡王能踵成其志

馬氏身為長史蓋親見兩賢王美行者其文以河閒獻王
為比無愧辭矣 又跋秦藩本史記嘉靖十三年秦藩鑒
抑道人序以明史諸王傳表攷之乃定王惟焯也序稱我
簡祖呻吟佔畢以力學終其身則為簡王誠泳定王為簡
王從孫傳稱有賢行序言景慕衛武以鑒抑名軒則信乎
其有賢行矣 嚴元照書宋板王荆文公詩注殘卷後乾
隆乙卯予從友人借得宋刻兩冊有敬德堂圖書印子子
孫孫永吉用印蓋明晉藩藏書也 式古堂書畫攷趙待
詔瑤島會真圖有晉國奎章道濟書府晉府書畫之印清
和珍玩乾坤清氣各朱記

光澤系出自遼府高唐系出自衡府廬江系出自鄭府與徽

府書共千古

光澤榮端王寵瀆
廬江王見洙

衡恭王祐樞
徽王

高唐王厚

明詩綜小傳光澤榮端王寵瀆遼惠王成鍊次子成化二
十三年封何喬遠云王積書萬卷世宗賜堂名曰博文

居易錄岳珂玉楮集衡府高唐王家鈔本流傳絕少高唐
王諱某號岱翁工篆隸癖嗜古書寫錄多祕本鼎革後散
落市肆紙墨精好裝潢工緻康熙乙巳青州市中得劉貢
父春秋權衡意林二書亦高唐府中物 天祿琳琅史記
明興宗第四子衡王允燧藏本有衡王圖書印昌熾案興
宗子封衡王者名允燧非允燧也允燧靖難時改封懷恩
王此衡王為憲宗第七子衡恭王祐樞高唐王名厚煥衡
恭王之從父以博雅聞俱見明史 拜經樓藏書題跋記

圖繪寶鑑黃蕘圃跋云收藏爲廬江王猶是幾百年前故物拜經樓主人以爲裝潢極精非民間藏書吾見成化時閣本大唐開元占經每冊俱用黃綾作簿面黃絹作籤條此可見官書鄭重卽裝潢可辨也簡莊徵君跋云廬江王藏書甚富余所見凡數種皆善本云昌熾案天祿琳琅續編元本貞觀政要有宗藩清暇廬江王文房記二印明宗室世系表鄭簡王祁鏌第十子見浦別封廬江王歷四世祐昂厚光載禪 持靜齋書目宋刻卽君胄詩有廬江王文房印 讀書敏求記蟋蟀經二卷予昔藏微藩芸窗道人五綵繪畫本爲季滄葦豪奪去 千頃堂書目簿錄類徽府書目一卷衡府書目一卷

憔悴廬山一炬痕絳雲種子已無存精靈未絕青蘿本不見
中郎見虎賁 宋文憲濂 曾魯得之

澹生堂藏書約勝國兵火之後宋文憲公讀書青蘿山中
便已聚書萬卷 百宋一廬賦廬山長慶見取六丁金華
太史獨著精靈注長慶集北宋時鏤板所謂廬山本者庚
寅一炬種子斷絕唯此金華宋氏景濂所藏小宋板圖記
宛然古香可愛推希世珍昌熾案此書亦見讀書敏求記
今藏潘文勤師滂喜齋 天祿琳琅續編宋本春秋經傳
集解有文淵閣印金華宋氏景濂諸印又史記文選皆有
景濂印 持靜齋書目羣書事林廣記前集卷之一後集
卷之二陳元靚編宋刊本有陶九成宋景濂藏書諸印攷

明史藝文志彙補宋有陳元觀事林廣記十卷蓋卽其殘帙陶宋二公藏書至今尙存吉光片羽固不得以尋常殘牘視之矣 宋濂禮部侍郎曾公神道碑公諱魯字得之所藏子史動數百家各攬其精而掇其華聞有僻書隱牒不憚道里之遠必購得之

偶來山廨餌蒼朮燕俎匏尊剌礪流我到松雲堂上坐圖書散盡五湖秋

徐達左良夫

蘇州府志徐達左字良夫受易於鄱陽邵宏道又受書於天台董仁仲隱居光福山中洪武初鄉人施仁守建甯請爲其學訓導卒於學官 倪雲林集外詩七日訪徐良輔十三日至七寶泉上及暮舟還耕雲軒桂樹窗閒臥看雲

風吹花落紫綸巾偶來山廨餌蒼朮又向江波采白蘋
又八月七日偕耕雲叟訪耕漁隱者留三日有圖書筆硯之樂雲臥雨聲集庭樹颯以秋身同孤飛鶴心若不繫舟
燕俎登松菌匏尊剌礪流 吳寬題東坡遺張平陽詩眞蹟舊藏光福徐良夫家良夫所藏高編大冊甚富今不存矣 百宋一廬賦覲溫國於徐廬鍼傳家之膏肓注司馬公文集八十卷每半葉十二行每行廿字有朱書一行云洪武丁巳秋八月收鈴以小方章一文云徐達左印又大
方章一文云松雲道人徐良夫藏書 式古堂書畫攷朱澤民秀野軒圖良夫題有松雲生耕漁軒良輔三印 昌熾案良夫明初爲建甯學官虞堪亦曾仕雲南府學教授

皆嘗入明 四庫提要堪集著錄於楊文貞之前今從其
例列明初次宋文憲之後又案耕漁軒在光福鎮同治中
先師馮景亭先生卽舊址重建其地直虎山橋三面臨水
湖光山色皆在襟袖間昌熾每登其堂徘徊不忍去

青城劒氣在松陵卓行清才一見微俯仰遺文三太息屋梁
落月照漁簪 虞堪勝伯 虞子賢

姑蘇志虞堪字克用一字勝伯宋丞相允文諸孫後家長
洲隱居行義家藏書甚富多手自編輯雅重先世手澤聞
有雍公遺文千里外必購得之 列朝詩傳克用爲雲南
府學教授卒於官子鏞教授里中孫湜始去儒湜之子權
家益貧斥賣先世故物以供衣食權死時勝伯遺文及所

藏詞翰無慮數篋妻子以魚罾裹置屋梁久之并其罾亡
矣徵文獻者爲三歎焉 倪瓚笠澤留別勝伯詩清才卓
行虞徵士食粥三年致母喪詩法道圓能繼武畫傳洪谷
早升堂 韶宋樓藏書志何水部集三卷文嘉跋云後有
虞茂題一詩而用虞戡之印戡字勝伯茂或其別名也
又鼓枻橐一卷元虞戡叔勝撰昌熾案勝伯一字叔勝倪
雲林有次韻叔勝先生詩亦號青城山樵楊廉夫鄧羽詩
序云至正庚寅予游錢塘過四壁山中與青城山樵遇出
示古劒其先公雍國所遺卽指戡也又邾經次韻克用詩
單子來歸自笠澤爲說虞君猶遁栖青城從子識丹鳳西
郊草堂懷碧雞 蘇州府志虞子賢世居支塘家藏書史

及古今法書名畫甲於三吳後又得朱子城南雜詠真蹟
構堂貯之顏曰城南佳趣

燕子飛來慟革除義門高擗肇窠書方黃菹醢樓常在未必
辱王遽忽諸 浦江鄭氏

明詩綜小傳鄭淵字仲養浦江人 靜志居詩話麟溪鄭
氏先世自滎陽徙歙再徙睦州其居麟溪自淮始淮之孫
綺乾道中賜號冲素處士是爲義門第一世綺之子聞聞
之子運運之子政政之子德璋德璋之子文融文融嗣子
欽仲養蓋欽之叔子也凡歷五十三世一千六百六十餘
年逮元季明初門才益甚曰深曰濂曰源曰濤曰泳曰渙
曰淵曰湜曰濟曰涓曰溟曰沂出處不齊先後以才行著

一門羣從又有櫺槿杖枋材榦彬楷模桐柎棠機柏栝木
皆爲士林所重於是公卿大夫先後詩文貽贈者編爲麟
溪集二十二卷洵盛事矣 紫桃軒雜綴國初浦陽義門
鄭氏藏書八萬卷家有藏書樓建文君爲書肇窠大字作
扁古名賢書畫妙蹟亦不下五六百種 人海記浦江鄭
氏八萬卷燬於火

村塾何從得佩觿百錢惟有蝶雞棲平泉草木荒寒甚東里
家風尙斷齋 楊文貞士奇

明史楊士奇傳名寓以字行泰和人早孤隨母適羅氏已
而復宗建文初以史才薦召入翰林充編纂官成祖卽位
改編修仁宗卽位擢禮部侍郎兼華蓋殿大學士英宗正

統九年三月卒年八十贈太師諡文貞 徐渤筆精楊文
貞士奇少孤貧十六歲出爲村落童子師欲買史略二冊
百錢不能得其母夫人畜一牝雞數歲命以易之世有此
母安得不生此子 又楊文貞文籍志序云吾先世藏書
數萬卷元季悉燬於兵吾早有志於學而孤貧不能得書
稍長事鈔錄無以爲楮筆之費則往往從人借讀不能數
得年十四五出教童蒙頗有所入以供養不暇市書也弱
冠稍遠出授徒所入頗厚始蓄書不能多也及仕於朝有
常祿又時有賜賚節縮百費日月積之一爲收書之資歷
十餘年經史子集雖不能備視吾先世所藏千百之什一
視吾少時可謂富矣夫人於其所好勞心苦力以求得之

必將謹護珍襲不至於廢壞逮後之人未嘗知得之之難
蓋有棄之如瓦礫者吾懼後之人不知守也志吾之所以
得而勉其所以守蓋昔人愛一草一木猶戒子孫以勿壞
矧書籍聖賢至訓之所寓乎敬之哉 又宋虞世和甫最
愛黃庭堅每得佳墨精紙奇玩必歸魯直國初王羽儀之
最善楊士奇楊喜收書或數月不相見相見輒贈一書皆
贈遺得人者也 讀書敏求記胡方平易學啟蒙通釋二
卷昔楊文貞公得此書於伯氏無何失去伯氏不樂至形
諸詬詈昔人矜重書籍如此後學勿漫視之 天祿琳琅
續編常建詩集明楊士奇家藏有東里草堂廬陵楊士奇
印二朱記

牧馬真能除害馬車船來往載書隨里中但祝庚桑楚未有
桐鄉朱邑祠 周文襄忱 國朝丁日昌禹生

明詩綜小傳周忱字恂如廬陵人戶部尙書改工部諡文
襄性好儲書其藏室詩云羣經既竝蓄百氏無棄捐所至
每充棟來往勞車船 乾隆蘇州府志名宦傳周忱牙樂
二年進士宣德五年用大學士楊榮薦授工部侍郎巡撫
江南景泰四年十月卒 丁中丞名日昌字禹生廣東豐
順人同治閒開府吾吳御吏嚴而愛民如子身後謗譽參
半實則精明慈惠文襄之後能福吾吳民者公其一也藏
書極富其爲上海道時宜稼堂郁氏宋元舊本都歸插架
有持靜齋藏書目五卷其尤精者景祐本漢書世綵堂昌

黎集及宋刊禮記要義禮記集說兩漢會要東都事略皆
至寶也中丞後改閩撫解官後芸籤縹帶載歸韓江吾友
袁寶璜補仲曾寓其齋一飽眼福 中丞百蘭山館集有
園居雜詠云中歲嗜古籍簡編時在手俟宋復佞元第恨
乏科斗人或嗤畫龍我自饜芻狗思誤亦一適窮源須緩
叩不嫌萬卷陳但恨二豎蹂文園豈消渴昌谷輒干嘔漸
覺入膏肓何自致枯朽夜夢儒冠人自言忘年友指示痼
疾由恍若肝膽剖琅嬛本福地俗客奚可守君非蓬島仙
藝苑漫蒐取譬如雞皮翁強擁盧家婦情意不聯屬自顧
增老醜又如灌園夫遽膺青紫綬進退失常度有若被械
扭彼蒼吝清福不在富貴後胡爲聚寶笈享之若敝帚何

不學處仲開閣任奔走送書如送窮去病猶去垢聞言意
開豁默審心沮忸思欲捐夙好又恐受誑誘去書若存病
無苗徒賸莠吾書亦有神敢一卜休咎稽首決從違神曰
然否否 莫友芝宋元本經眼錄儀禮鄭注宋淳熙本同
治甲子署蘇松太道丁禹生獲之上海肆中審定爲實事
求是齋經籍之冠

一騎傳宣至北平叩頭伏地頌神明傳家忠孝空言耳但解
從橫效蒯生 袁忠徹靜思

明詩綜小傳袁琪字廷玉鄞人有柳莊集 靜志居詩話
家本土族其父彥章仕元爲翰林國史檢閱世稱菊村先
生嘗作布衣歌云我家頗讀書初非田舍翁道其實也

今言類編廷玉少游海上遇異人授相術論人吉凶輒驗
成祖聞廷玉名洪武二十三年九月密召至北平一見伏
地叩頭曰眞太平天子靖難後召爲太常寺丞子忠徹序
班未幾琪請老歸卒贈太常少卿忠徹能傳父術宣德中
嘗侍上言天顏慘肅恐宗人有急變未七日高煦反書至
官尙寶少卿致仕卒年八十有三 莫氏經眼錄皇朝仕
學規範四十卷宋淳熙本有尙寶少卿袁氏忠徹印及袁
氏靜思齋引顏氏家訓六十五楷字長木記 陸心源蜀
大字殘本漢書跋袁忠徹字公達一字靜思天順二年卒
年八十三性好學博涉多聞陳敬宗符臺外集序稱忠徹
退朝之暇日與縉紳文士磨礪諷詠故其收藏亦富 式

古堂書畫攷東坡書劉錫敕有忠徹南昌袁氏家藏珍玩
子孫牙保袁申儒印諸朱記 又趙待制臨洛神賦有忠
徹瞻袞堂朱記 又袁伯長同日分途帖有袁氏父子列
卿忠孝世家袁氏忠徹朱記

涌出飛泉映佩刀霜寒絕徼憶麾旄百餘年後方星散畢竟
書廚鎖尙牢

葉文莊盛

元孫恭煥伯寅

七世孫國華白

明史葉盛傳盛字與中正統十三年進士吏部左侍郎諡
文莊成化十年卒 歸有光太學生葉君墓誌銘文莊生
鄉進士諱晨晨生衡州府同知諱夢淇君之考也君諱良
材字世德爲文莊公世嫡曾孫子二人長恭煥次恭烝孫
男二人儉封儉圭 乾隆蘇州府志崑山葉文莊公盛宅

在東城橋西公生平嗜書手自讐錄至數萬卷嘗欲作堂
以藏之取衛風淇澳學問自修之義名曰菴竹至公之元
孫恭煥堂乃克成王世貞爲記恭煥又於宅東作繭園其
孫工部國華拓地增葺嘗掘地得泉味甘色白因自號白
泉云恭煥曾孫 本朝刑部侍郎方藹猶居此昌熾案恭
煥字伯寅嘉靖丙午舉人見府志選舉又號括蒼山人
國朝葉奕苞字九來一號二泉亦文莊裔孫 錢大昕江
雨軒集跋文莊藏書之富甲於海內服官數十年未嘗一
日輟書雖持節邊徼必攜鈔胥自隨每鈔一書成輒用官
印識於卷端其風流好事如此 鐵琴銅劍樓書目論語
一卷文莊藏書張棟記云文莊沒後百十有餘年而其圖

書府局鑰未疏此帙有鎮撫燕雲關防巡撫宣府關防印
靜志居詩話文莊儲藏之目爲卷止二萬餘然奇祕者
多亞於冊府二百年子姓蕃衍瓜分豆剖難以復聚今披
棗竹堂目商盤泗鼎要非近代物惜不可得而觀矣 東
齋脞語文莊書廚銘云讀必謹鎖必牢收必審閣必高子
孫子惟學敦借非其人亦不孝昌熾案此銘亦附棗竹堂
書目序後愛日精廬藏書志金石錄三十卷文莊手跋署
吳郡葉仲盛仲盛疑爲其號又案王聞遠蛻庵集跋蛻庵
者崑山先輩文莊葉先生別號也開卷有葉氏棗竹堂藏
書圖印乃葉孝廉白泉圖記文莊又號涇東道人又號澱
東老漁張棟所藏論語又云有雄於南面百城大樹軒文

莊七世孫三印上兩印是否出葉氏不可考余所見有楷
字長方印其文曰葉文莊公家世藏則其後人所鈐也又
有下學齋圖書記一印出葉九來

八十樓中校說郭但供書帕餽當途何如南部煙花本高度
妝樓四大廚 郁文博文博 老寇四

上海縣志郁文博字文博景泰五年進士湖廣副使致仕
歸居萬卷樓年七十有九丹鉛校核不去手注前志遺事
載文博家居校刊陶九成說郭一百二十卷自賦詩云白
頭林下一耆儒終歲樓閒校說郭目力心思俱竭盡不知
有益後人無其風趣如此 書影余幼時在金陵聞舊曲
中老寇四家有說郭全部以四大廚貯之近見虎林刻本

纔十六套每一種爲數少者尙全鐫多者咸爲逸去甚至
每一集有存不四五葉者陶氏當時卽有去取未必如是
之簡此刻未出時博古之士多有就寇氏鈔錄者及此刻
出不知者以爲說郭盡於此更不知求其全余嘗言自刻
本說郭出而說郭亡矣 邵懿辰簡明目錄評本說郭明
人有書帕本往往刷印此書數十種卽稱某叢書予嘗見
唐宋叢書卽是也

邢生邢生益無糧不居北郭亦東莊折鐺敗席家風在自寫
奇書資野航 邢量用理 邢參麗文

黃省曾貧士傳邢量字用理吳郡人也敝屋三間青苔滿
壁室中惟左右古書薪水躬自秉執贊曰邢叟好古經綸

史究室乏御令身勞井曰晨炊昏餐著麻寒覆問奇有來
如鐘在叩 姑蘇志用理隱居葑門以醫卜自給折鐺敗
席蕭然如野僧其學無所不通室中臥榻之外皆藏書手
自校定 列朝詩傳邢參字麗文教授鄉里以著述自娛
遇雪累日囊無粟兀坐如枯株人往視之見其無慘慄色
方苦吟所得句自喜又連日雨復往視屋三角墊怡然執
書坐一角不爨亦累日矣其祖用理遺叱鼠賦人謂麗文
君無益盜之糧正不必效乃祖作賦也昌熾案乾隆蘇州
府志謂麗文量之族孫未知孰是常熟瞿氏藏太元集注
宋鈔本有葑溪邢參題字則參所居猶是用理葑門老屋
矣 靜志居詩話明初高季迪有北郭十友麗文亦有東

莊十友吳燿次明文徵明徵仲吳奕嗣業蔡羽九達錢同
愛孔周陳淳道復湯珍子重王守履約王寵履吉張靈孟
晉故其詩云昔賢重北郭吾輩重東莊 讀書敏求記韻
語陽秋二十卷丹陽葛立方撰朱性甫借得此書宋槧本
邢麗文命工摹寫二部舉其一贈性甫朱守中又從性甫
借歸宏治癸亥金成性又錄成此本守中爲題其卷尾三
君皆衡山好友安貧樂志吳中雅士也

縱有通靈畫一廚豈無竊藏豎頭須慨然請返連城璧不必
分吹一一竽

沈周啟南

子雲鴻維時

無聲詩史沈貞字貞吉弟恆字恆吉長洲相城里人徵士
孟淵子也恆吉子周字啟南號石田人稱石田先生精於

誦肆自墳典邱索以及雜家言無所不窺嘗以重直購古
書一部陳之齋閣一日客至見而諦視之問書所從得先
生曰客何問也客曰公幸無詫書吾書也失之久矣不意
乃今見之先生曰有驗乎曰某卷某葉某嘗書記某事或
者猶存乎先生發而視之果驗卽歸之終不言售者姓名
亦不謙何售者 明史沈周傳年八十三以正德四年卒
眉公筆記沈雲鴻字維時石田之子也好古書畫往往
傾橐購之縹囊細帙爛然充室又喜積書讐勘劇曰後
人視非貨財必不易散萬一能讀則吾所遺厚矣先石田
而卒 式古堂書畫攷石田有竹居圖卷周鼎題詩云頭
白話今雨汗青藏古書吳瑄元玉和云有田皆種石無屋

不藏書又徐熙梅花圖卷沈貞吉跋有陶庵墨雲香處朱
記昌熾案陶庵爲貞吉之號又號陶然道人又白石翁灣
東草堂圖有后南江鄉深處二朱記 鐵琴銅劍樓書目
唐賢絕句三體詩法卷首有朱文圓印曰鏡及吳興有竹
居蓬壺侍史飛華亭諸朱記

亭館相通旁五湖衣冠如見列仙圖自從西史薪傳歇文獻

飄零悵我吳

史鑑明古

裔孫兆斗辰伯

李鑑明古

列朝詩傳史鑑字明古吳江人吳文定公表其墓云吳江
穆溪之上有隱士曰史明古於書無所不讀而尤熟於史
家居水竹幽茂亭館相通客至陳三代秦漢器物及唐宋
以來書畫相與鑒賞好著古衣冠曳履揮麈望之者以爲

列仙之儔也又云居西村人稱西村先生有西村集 平
津館鑒藏書籍記元本南史有史鑑之章子孫保之西史
村人三印 池北偶談史兆斗字辰伯鑑之後徙居長洲
博雅多藏書康熙初卒年八十餘汪茗文曰此翁死吳中
文獻絕矣 汪琬史辰伯傳辰伯少受學於劉鳳王穉登
爲諸生不得意卽棄去喜蓄書所購率皆祕本或手自繕
錄積至數千百卷齋居蕭然惟事讐校或偶有所得輒作
小行楷疏注其旁 昌熾案義門弟子姓氏錄有李鑑明
古亦好藏書顧澗蘋黃蕘圃屢稱之士禮居題跋記所載
博雅中吳紀聞李校書集皆其家書也兩人名字皆同殆
亦如長卿之慕蔣生乎

亭父鼎儀謝弗及廉州石谷同名家可比浚川與臨穎難言
毘陵及琅邪 陸容文量 王時敏遜之

明詩綜小傳陸容字文量太倉州人成化丙戌進士浙江
右參政有式齋集 靜志居詩話參政與張亨父陸鼎儀
齊名號婁東三鳳其藏書之富見聞之周洽非亨父鼎儀
所能及也 祝允明甘泉陸氏藏書目序故浙江參政式
齋陸先生文量以雅德碩學偉才高識立言於憲孝兩朝
平生蓄書甚富既歿其子鄉貢進士安甫彙列其目并已
所得者通繫之凡爲經史子集合若干卷 千頃堂書目
簿錄類臨穎賈氏藏書目二卷賈詠又浚川何山書目一
卷又陸容式齋藏書目錄 明畫錄王時敏字煙客太倉

人文肅公錫爵之孫衡之子以門蔭官鹽丞工詩善楷隸
山水 吳偉業和王太常西田雜興韻其六云蕭齋散帙
知耽癖高座談經早解圍 又歸村躬耕記吾友王煙客
太常治西田於歸涇之上去城西十有二里 天祿琳琅
續編內經素問有婁東埽花庵鑒賞王時敏印煙客氏四
朱記 平津館鑒藏書籍記通典詳節有王時敏鑒賞書
畫記印 昌熾案太倉王氏文肅郡望爲太原弇州山人
郡望爲琅邪文肅藏書有王氏賜書堂印記

吏部東廂晚年筆後來一字一琅玕縱橫深得髯蘇意鬱律
蛟螭澗底蟠 吳文定寬 伊侃

明史吳寬傳吳寬字原博成化八年會試廷試皆第一禮

部尙書卒贈太子太保諡文定長子奭次子奭蘇州府志藝文類吳寬叢書堂書目一卷朱彝尊書尊前集後康熙辛酉冬予留吳下有持吳文定公手鈔本告售書法精楷卷首識以私印書肆索直三十金靜志居詩話匏庵遺書流傳者悉公手錄以私印記之前輩風流不可及也何焯金石錄跋崑山葉文莊公故物首尾二紙則公手所自書余收得吳文定公寫本亦皆然乃知前賢事事必有體原貴乎多見而識之也翁方綱題吳沈詩草合卷後匏庵手鈔諸卷帙自署吏部東廂書者皆晚年筆藏書紀要匏庵鈔本用紅印格其手書者佳昌熾案余所見叢書堂鈔本公手書者精采奕奕筆法絕似蘇長公

王氏稱子貞爲尙寶公今觀跋尾述文恪語謂吳中刻左傳郢中刻國語閩中刻漢書而史記尙未板行延喆因取舊藏宋刊重加校讐翻刻於家塾則宋本爲文恪舊藏又言工始於嘉靖乙酉臘月迄丁亥之三月則亦非一月而成子貞早歲豪放世傳其佚事漁洋遂筆之於書如謂延喆爲尙寶少卿文恪少子亦攷之未審也昌熾案邵寶撰文恪墓誌銘子男四長延喆中書舍人次延素南京中軍都督府都事次延陵郡諸生次延昭七十二峰足徵集王延陵字子牙號少溪文恪季子以父蔭爲中書舍人希心風雅早歲與皇甫子循張幼于輩結社有春社編玉中舍集明詩綜小傳徐縉字子容吳縣人宏治己丑進士

歷官吏部左侍郎諡文敏 士禮居藏書題跋記書苑菁華二十卷徐元佐跋謂其先文敏公所遺文敏王文恪之壻西洞庭人昌熾案今林屋徐氏猶聚族而處亡友徐君敦仁號愛杉丙子優貢官江西知縣所居東宅河頭老屋卽文敏舊第 天祿琳琅文選王世貞跋云此本繕刻極精紙用澄心堂墨用奚氏往見於同年朱太史家云得之徐太宰又張鳳翼跋云予嘗見於徐文敏嗣君架上云是文敏所鍾愛以貽其後之人者紙墨精好神采煥發且有趙文敏手識則知此書嘗入松雪齋中夫前後相去二百年去一文敏復歸一文敏豈有夙緣邪 又云玉臺新詠密行細字清朗照人明王鏊藏本有濟之印又有御題文

學侍從印御書渭北春天樹江東日暮雲何時一樽酒重與細論文二十字印又明刻六子全書有吳趨橢圓印三槐之裔大宗伯章方印 妮古錄思陵草書一卷有王濟之圖書及三槐堂印 紅豆樹館書畫記沈度寶積圖文恪跋有震澤世家印 邵文莊容春堂集文恪序引首用顏樂堂印

望洋欲叩草堂門襟帶江湖亦水邨汎汎瓜皮尖艇子田田荷葉舊裝痕 徐源仲山 徐澄季止 陸完全卿

王文恪通議大夫都察院右副都御史徐公墓誌銘公諱源字仲山成化乙未進士當官涖政未嘗一日去書不觀文章博雅書有米家父子風 又襟帶江湖樓詩爲仲山

都憲作三江東去五湖西特起高樓枕碧溪桐里波光天外小洞庭山色雨中迷 李東陽瓜涇集序公世居蘇之長洲卜築於瓜涇之上因地爲號別號椒園道人 吳文定望洋書堂記徐君季止鄉校士之良者家夾浦之南瓜涇之上而松江陳湖皆在其目睫聞蓋將聚書數千卷築室而藏之因題曰望洋書堂昌熾案徐氏家譜季止名澄宏治元年科貢江西南昌府經歷少有文行王文恪送徐季止還南雍詩云君家兄弟世所稀文采風流仍孝友蓋實錄也 吹網錄避暑錄話瓜涇徐氏荷葉裝舊鈔本與禾中項氏藏陳仲醇手鈔本互有詳略 天祿琳琅續編宋刻史記有水邨陸氏珍藏朱記陸完字全卿號水邨長

洲人成化丁未進士官吏部尙書 又隆平集有水邨校藏珍玩朱記 又諸臣奏議有水邨陸氏珍藏朱記

排闥狂呼月未闌甕頭更酌一杯殘野航又繼堯民逝散盡珊瑚與木難 朱存理性父 朱堯民凱

文徵明朱性甫先生墓誌銘吾蘇朱性甫存理朱堯民凱人稱曰兩朱先生正德壬申堯民死明年性甫又死 又云兩人皆不業仕進又不隨俗爲廬井小人之業日惟挾冊呻吟求昔人理言遺事而識之素皆高貴悉費以資其好不恤也 又云性甫聞人有奇書輒從以求以必得爲志或手自繕錄動盈筐篋羣經諸史下逮稗官小說無所不有尤精楷法手錄前輩詩文積百餘家他所纂集有經

子鉤元吳郡獻徵錄名物寓言鐵網珊瑚野航漫錄鶴岑
隨筆總數百卷 昌熾案今所傳鐵網珊瑚十六卷乃趙
清常所輯性甫書八卷名珊瑚木難 列朝詩傳性甫從
杜瓊先生游有異書手自繕錄旣老不厭而坐貧無以自
資其書旋亦散去每撫之歎息 四友齋叢說朱野航乃
葑門一老儒也在菽扁王氏教書與主人晚酌罷主人入
內適月上野航得句云萬事不如杯在手一生幾見月當
頭喜極發狂大叫叩扉呼主人起詠此二句主人亦大擊
節取酒更酌興盡而罷 靜志居詩話祝希哲贈性甫詩
云書鈔滿篋皆親手詩草隨身半在舟

爨婦蓬頭穉子嗁可憐斷爛到籤題逢人願解奚囊贈莫使

飄零歎噬臍

楊循吉君謙

劉昌欽謨

明史文苑傳楊循吉字君謙成化二十年進士授禮部主
事善病好讀書每得意手足踣掉不自禁用是得顛主事
名 列朝詩傳君謙善病致仕年才三十有一居家好蓄
書聞某所有異本必購求繕寫結廬支硎山下課讀經史
以松枝爲籌不精熟不止多至千卷卒年八十九其詩文
爲松籌堂集 澹生堂藏書訓略聞楊儀部君謙性最嗜
書家本素封以購書故晚歲赤貧所藏書十餘萬卷纂其
異聞爲奚囊手鏡 人海記楊循吉旣老散書與親故云
令蕩子爨婦無復著手亦一道也 靜志居詩話君謙好
蓄異書題書廚詩吾家本市人南濠居百年自我始爲士

家無一簡編辛勤二十載購求心頗專小者雖未備大者亦略全經史及子集一一義貫穿當怒讀則喜當病讀則痊恃此用爲命縱橫堆滿前當時作書者非聖亦大賢豈待開卷看撫弄亦欣然奈何家人愚心惟財貨先墜地不肯拾斷爛無與憐朋友有讀者悉當相奉捐勝付不肖子持去將鬻錢又鈔書詩云沈疾已在躬嗜書猶不廢每聞有奇籍多方必羅致手錄兼買人恆輟衣食費往來繞案行點畫勞指視成編亦艱難把玩自珍貴家人怪我癖既宦安用是自知身有病不作長久計偏好固莫捐聊以從我意是時吳中藏書家多以祕冊相尙若朱性甫吳原博閻秀卿都元敬輩皆手自鈔錄今尙有流傳者實君謙倡

之也 鐵琴銅劍樓書目元氏長慶集有楊循吉跋曰宏治元年從葑門陸進士士脩借得宋本元氏集命筆生徐宗器模錄藏於雁蕩村舍之臥讀齋中牙爲珍翫且又借得白氏集亦方在錄可謂聯珠並秀合璧同輝矣 式古堂書畫攷趙子固梅竹譜卷循吉跋後有雁村居士印吳寬跋劉參政與楊君謙手簡劉公欽謨博學多聞所蓄書與崑山葉文莊公等觀此小簡與楊儀曹君謙託以購書者意甚懇懇可見矣君謙於公爲甥 乾隆蘇州府志劉昌字欽謨正統九年鄉試第一明年會試第二歷廣東左參政

海鶴詩中萬卷堂曬書儼類麥登場不關沈水都梁味二十

廚中別有香

邵文莊寶

無錫縣志邵寶字國賢別字泉齋亦曰二泉成化二十年進士戶部侍郎兼左僉都御史卒贈太子少保諡文莊又文莊第有容春精舍度藏書萬卷其中文莊勿藥集復喬司馬精舍狀精舍在無錫城東南隅冉涇之上卽吾七世祖元處士容春府君舊居也扁曰容春精舍未幾別建於西門之口扁曰二泉精舍中堂三間仍扁曰容春前堂五間中爲廚二十度古今書籍萬餘卷扁曰泉齋又容春堂續集曬書二首其一云連日曬書如曬麥人閒耕學本來同又偶聞書香詩少愛新書楮墨香不辭書價借錢償坐來精舍還懷舊海鶴詩中萬卷堂注云予二十

歲時海鶴寓於家嘗題先世畫有萬卷一堂邀我共之句天祿琳琅元本史記有錫山二泉邵氏家藏印又玉篇有二泉朱記又三禮攷注吳澄撰明邵寶藏本有容春堂錫山邵氏家藏朱記又續編宋刻初學記葉文莊盛菴竹堂藏書有文莊家學邵以成氏藏書之記二印昌熾案二泉諡文莊以成當其後裔非崑山葉氏也又宋刻春秋經傳集解有性命可輕至寶是重鐘式印又一橢方印其文云顏氏家訓曰借人冊籍皆須愛護先有缺壞就爲補治此亦士大夫百行之一也其餘藏印三家曰金華宋氏景濂曰二泉邵寶曰汪北樓鑒賞印前二印具見愛書苦心未知出於誰氏附記於此姚舜咨亦有顏氏家訓

一印與此小異 楹書隅錄北宋本王摩詰集每卷有二
泉主人聽松風處印

菑蔽何如打馬圖可憐一喝未成盧空爲子子孫孫計已共
名園付博徒 王獻臣敬止

蘇州府志王獻臣字敬止以錦衣衛籍舉宏治六年進士
授行人擢御史巡大同邊嘗令部卒導從游山爲東廠緝
事者所發謫上杭丞再謫廣東驛丞武宗立遷牙嘉知縣
量移高州通判致仕 又拙政園在婁齊二門之間嘉靖
中王御史獻臣因大宏寺廢地營別墅其子以樗蒲一擲
失之歸里中徐氏 平津館鑒藏書籍記經籍攷有吳門
王獻臣家藏書印詩禮傳家王氏圖書子子孫孫牙寶之

虞性堂書畫印四朱記 昌熾案潘文勤師藏宋刻國語

補音亦王氏藏書圖記略同又有己丑父印臨頓書樓二
朱記

突如焚如涕漣如何事斯文竟祝子華不注陽一憑弔舊時
月色上菴蘭 邊貢庭實

李廷相邊公神道碑公諱貢字庭實別號華泉其先淮陰
人也六世祖朝用元至正兵亂避地歷城華不注之陽公
宏治丙辰進士官南京戶部尙書癖於求書所蓄不啻數
萬卷子二長翼次習 列朝詩傳華泉弱冠舉進士雅負
才名美風姿諳吏事好交游天下豪俊久官留都優閒無
事游覽六代江山揮毫浮白夜以繼日王鉉爲掌憲忌其

名論去之癖於求書搜訪金石古文甚富一夕燬於火仰
天大哭曰嗟乎甚於喪我也病遂篤卒年五十七 華泉
集兩後讀三國志詩菴藹架底黃昏月且抱青芻學飯牛
尚書江左擅詞宗蓋祿何嘗非萬鍾三日於陵飢欲死鬻書
門塾署寒松 顧璘華玉弟璉英玉
明史文苑傳顧璘字華玉吳縣人宏治丙辰進士南京刑
部尚書 四庫提要浮湘集四卷山中集四卷憑几集五
卷續集二卷息園存橐詩十四卷文九卷緩慟集一卷明
顧璘撰史稱璘詩矩矱唐人以風調勝今觀其集遠挹晉
安之波近驂信陽之乘在正嘉閒不失爲第二流之首也
列朝詩傳顧璉字英玉華玉之從父弟也歷官河南副

使罷歸囊橐蕭然無以給所夕臨街一小樓扁曰寒松訓
蒙童數人以自給嘗絕糧華玉餽以斗粟不受霍渭厓爲
南宗伯以廢寺田百畝貲之堅拒不納 愛日精廬藏書
志晏子春秋八卷吳方山藏書有手跋曰顧英玉先生南
都清介丈夫也以憲副罷官家無長物出宦日所得書貨
以給日用躬疊冊門左顏無愧色予重其所爲得二書鳴
呼誦往哲之遺言法時賢之景行小子何幸於此兼得
千頃堂書目簿錄類顧尚書書目六卷注云顧璘

風雨羣鷗徑叩門讀書燈未滅深昏都生竟爲郎潛誤白髮
愁添種種痕 都穆元敬

列朝詩傳都穆字元敬吳縣人宏治進士官太僕少卿嘗

奉使至秦中訪其山川形勢故宮遺壤作西使記搜訪金石遺文作金薤琳琅歸老之日齋居蕭然日事探討或至乏食輒笑曰天壤間當不令都生餓死吳門有娶婦者夜風雨大至滅燭徧乞火無應者雜然曰南濠都少卿家有讀書燈在叩其門果得火其老而好學如此 文嘉何水部集跋楊祝都唐每得一異書則爭相誇示以爲樂故其所成皆卓然名世今異書聞出而學者視之漠然前輩不可及也 邊華泉集送都元敬詩才高憐晚達十載尙爲郎書買黃金盡愁生白髮長夏曹分武庫秋殿別文昌木脫霜臯冷何人共采芳 式古堂書畫攷周東村滿目雲山圖都穆題詩有乙卯舉人已未進士一印

皋廡來觀覆瓿經尊壺巾卷並充庭邢參寂默張靈笑一醉同登夢墨亭 唐寅子畏

乾隆蘇州府志唐寅字子畏一字伯虎晚皈心佛乘自號六如築室桃花塢與客日般飲其中年五十四而卒 文徵明飲子畏小樓詩君家在皋橋誼闡井市區何以掩市聲充樓古今書左陳四五冊右傾三兩壺 梅花草堂筆談高杏東先生得杜氏通典一部唐子畏所校也子畏每夜盡一卷用朱黃識其旁卷盡輒寫山水人禽竹木其端或書小詩或括前意爲一二語或紀日月誠一時佳玩也 讀書敏求記成元英疏莊子二十卷南京解元唐寅藏書北宋槧本之極佳者 又三辰通載南宋槧本有南京

解元唐寅印記並題字 士禮居藏書題跋記新雕注解
瑤珠子三命消息賦三卷校正李燕陰陽三命二卷勝朝
登學圃堂 鐵琴銅劍樓書目太元集注末有題識云宏
治乙卯臘月葑溪邢參觀於皋橋唐伯虎家 天祿琳琅
宋板童溪王先生易傳公是先生七經小傳唐寅藏書皆
有唐伯虎印羣經音辨有唐伯虎夢墨亭二印班馬字類
有唐居士印 昌熾案余在滂喜齋見宋刻袁樞通鑑紀
事本末唐子畏藏書有南京解元印每卷後皆有子畏題
字一云蘇臺唐寅子畏甫學圃堂珍藏書籍一云晉昌唐
寅醉中讀一云唐子畏夢墨亭藏書一云吳郡唐寅桃花
庵中夢墨亭書其餘大致略同夢墨亭者子畏乞夢仙游

九鯉神夢惠之墨一擔因而作亭祝京兆有記湧幢小品
載其事又按式古堂書畫攷唐伯虎金昌暮煙圖有吳趨
圖印又青山讀書圖有夢墨亭六如居士印

鷗波墨妙妙天下狼藉海東圓溷多完好如新雙檜本鬼神

在在爲搗呵 李文敏廷相

甲乙贖言劉元子從朝鮮還言彼中書籍多中國所無且
刻本精良無一字不做趙文敏惜爲倭殘毀圓溷之間往
往以書幅拭穢亦典籍一大厄也 天祿琳琅前編新刊
詰訓唐昌黎先生集明李廷相藏本廷相字夢弼濮州人
巡撫順天提督紫荆關李瓚之子宏治壬戌進士第三歷
官南京戶部尙書諡文敏 又歐陽文忠公文集字法規

傲鷗波元刊之精者明李廷相收藏 又續編松雪齋文集宋筠跋云先少師官豫章時所得爲濮陽李氏物集中鐫字圓健宛然文敏手筆尤屬可愛有濮陽李廷相書畫記印 楹書隅錄元刊王狀元集注東坡詩咸豐辛亥先公購於吳門每冊有濮陽李廷相雙檜堂書畫私印蓋吾郡李文敏故物三百餘年展轉復歸吾郡楮墨猶完好如新斯誠文字精英在在有鬼神呵護也 千頃堂書目簿錄類李蒲汀家藏書目二卷李廷相 式古堂書畫攷李龍眠羅漢圖卷有濮陽李廷相家圖籍印李廷相子孝元跋後有松橋碧山道人洗心書舍太保尙書之嗣三印

石川張氏崇古樓潁川陳氏至樂樓藏書充棟與汗牛足敵

懷煙顧孝柔

陳察原習

張寰允清

顧琨孝柔

蘇州府志陳察字原習常熟人宏治十五年進士僉都御史巡撫南贛乞休歸 又張寰字允清正德辛巳進士通政使參議致仕歸惟以圖史自娛人望之蕭然有神仙之氣 又顧雲鴻字朗仲江陰繆昌期長洲文震孟皆嚴事之曰朗仲我師也 海虞詩苑顧琨字孝柔朗仲先生子也幼承家學錢宗伯爲之師所著寸灰集皆言情之作子鈇字僧虔歲貢生昌熾案張溯伊莘庵有秋深過鳳邨有懷顧丈僧虔詩書淫傳癖貧猶在禪榻口燈老更親則僧虔亦好書也 天祿琳琅續編漢雋有石川張氏崇古樓收藏印 式古堂書畫攷解禎期臨蘭亭序有張寰跋用

張氏允清石川世居朱記 鐵琴銅劍樓書目雪樓集卷
首有石川張氏崇古樓珍藏印 又道鄉集卷首有巨印
其文曰蘇州常熟虞山精舍至樂樓主人河南道御史陳
察原習之記 又舊唐書明刊本有記云借得錢遵王所
藏至樂樓鈔本校 又李文公集卷首有顧孝柔懷煙閣
讀書記朱記

獼髓真成績命膠衣如百衲莫輕拋但嫌著錄開新例倉雅

軒岐一例包

陸文裕深
澄幼清

黃標良玉

施大經天卿

朱懋

上海縣志陸深字子淵號儼山宏治十八年進士歷官詹
事卒贈禮部右侍郎諡文裕文章有名於時 松江府志
文裕子楫字思豫才思警敏有蒹葭堂橐 藤陰雜記錄

兩樓陸文裕舊邸在正陽宣武二門之間東曰素軒北曰
澹室中爲書窟 文裕江東藏書目錄序余家學時喜收
書然覩覩屑屑不能舉羣有也壯游兩都見載籍然限於
力不能舉羣聚也聞有殘本不售者往往廉取之故余之
書多斷缺缺少者或手自補綴多者幸他日之偶完而未
可知也正德戊辰夏六月寓安福里宿痾新起命童出暴
既乃次第於寓樓數年之積與一時長老朋舊所遺歷歷
在目顧而樂焉余四方人也又慮放失是故錄而存之各
繫所得儻後益焉將以類續入是月六日史官江東陸深
識昌熾案文裕書目世無傳本此序見式古堂書畫攷其
著錄之例十三經第一理性第二史第三古書第四諸子

第五文集第六詩集第七類書第八雜史第九諸志第十
韻書第十一小學醫藥第十二雜流第十三以小學醫藥
合爲一類爲諸家所未有其言云不幼教者不懋成不早
醫者不速起其道一也亦好奇之過歟書畫攷又載陸子
淵白雁詩卷後題嘉靖丁亥儼山人陸深試東坡藏研書
於三十六峰之卷懷堂有國史經筵官印朱記又夜燕詩
帖題四酉齋試筆儼山老人 上海縣志黃標字良玉藏
書甚富繙閱無閒寒暑陸深臨文有疑義必屬標攷核輯
古今說海一百四十二卷著書學異同二十二卷 又萬
厯閒郡中藏書之富者王洪州圻施石屏大經宋幼清懋
澄俞仲濟汝楫四家爲最幼清尤多祕本及名人手鈔石

屏歿後子沛然復購益之其書目四冊高五寸許石屏有
收藏印章曰施氏獲閣藏書古人以借鬻爲不孝手澤猶
存子孫其牙寶之 又秦鳳樓嘉楫手鈔書甚多嘗見吳
冢志三卷楷法學趙吳興宋幼清題其後曰此秦侍御手
書蓋先輩之惓惓於文獻者 昌熾案大經字天卿萬厯
十三年舉人仕至惠州通判獲閣疑有奪字

蜀水京山天下秀滄江虹月本來多東游若欲尋雞次且挂

輕帆過曲阿

孫道靜景瞻
賀裳黃公

孫楨仲牆

孫育思和

賀煥

好古堂書畫記嘉靖時孫楨字仲牆號石雲丹陽人收藏
書畫古物最富攷據甚精 又云丹陽孫氏收藏書畫最
富嚴嵩得丹陽孫育畫二冊重題祕藏之見直廬橐 楹

書隅錄宋本史記廣漢張杼守桐川時用蜀小字本重雕
有孫育私印曲阿孫育南徐孫育思和印章孫思和圖籍
篆京山孫育七峰道人開皇山下人家碧山草堂北固山
第一峰諸印 又宋本元豐類彙有曲阿孫氏禹見珍玩
照庵曲水山房蜀山草堂拙訥隱者諸印 昌熾案詒宋
樓藏書志湖北提舉茶鹽司新刊前漢書一百二十卷有
題字云正德二年三月吉日裝景瞻又一跋云余見宋板
漢史不下五六部未有若此之全口者子孫其永保之正
德二年三月丹陽孫道靜重裝卷中有飛雲閣圖印景瞻
方印二跋同年同月又皆云重裝道靜景瞻定當爲一人
名字其人在正德中則前於仲牆思和諸孫莫先於此矣

禹見不可攷詒宋志又有蘆浦筆記十卷謝兆申錄於丹
陽賀進士烺家卽池北偶談所稱丹陽賀氏本也 天祿
琳琅詩緝明趙府刊本有賀黃公藏書印載酒園詩話賀
裳字黃公丹陽人有少賤齋集

書法歐虞畫右丞停雲突過趙吳興辛夷翠竹孫枝秀繼體

先聞有二承

文壁徵明子彭壽承

嘉休承

孫元發子

乾隆蘇州府志文林字宗儒成化壬辰進士温州知府

楊循吉温州知府文公墓誌銘子男三人奎壁室 明史

文徵明初名璧以字行更字徵仲別號衡山父林爲温州
知府正德末巡撫李充嗣薦授翰林院待詔乞歸嘉靖三
十八年卒年九十矣長子彭字壽承次子嘉字休承 王

世貞吳中往哲傳彭號三橋善書以貢授秀水訓導擢南
京國子助教卒年七十六嘉畫得待詔一體以貢授烏程
訓導擢和州學正乞歸卒年八十三 式古堂書畫考彭
號雁門嘉號水文文伯仁字德承號五峰又號葆生攝山
老農徵明姪昌熾案雁門乃文氏郡望非彭號也 讀書
敏求記項墨林每遇宋刻卽邀文氏二承鑒別之故藏書
皆精妙絕倫 文嘉有嚴氏書畫記 鷗陂漁話相傳衡
山初名璧因文信國子璧仕元不欲與同名故以字行然
證以其兄名奎及徵明之字俱與璧宿義近作璧爲是葉
晉卿祿藏衡山作海月圖署正德丁丑九月文璧其字从
土不从玉凌子與曰黃佐衡山墓誌公孫五人元肇元發

彭出元輔元弼臺出元善嘉出臺先卒元發字子悱 明
史文震孟字文起徵明曾孫父衛輝同知元發震孟天啟
二年殿試第一授修撰歷官東閣大學士諡文肅弟震亨
字啟美中書舍人國亡發病死 國朝通諡節愍 天祿
琳琅續編戰國策元板長洲文氏藏本書中墨跡三處凡
例後楷書萬曆戊子七月望日手裝於願賢堂定之筆卷
五後八分書戊子八月一閱於心遠閣鈐印二文從鼎定
之卷十後八分書戊子十月惜陰齋漫閱鈐印一文從鼎
又楷書庚戌三月十八日悟言室閱過從鼎字定之萬曆
甲午舉人嘉之孫也 乾隆蘇州府志文從簡字彥可嘉
孫元善子郡諸生隱於寒山之麓子柎字端文 又文揆

字賓曰柎子志尙高潔居停雲舊館終歲不出 朱彝尊
文與也墓誌文點字與也震孟孫晚自號南雲山樵子赤
字周烏 昌熾案文氏自明中葉迄於 國初文采風流
照映江左今彫竇盡矣文肅公墓在石湖旁猶憶十餘年
前欽韻珊地師爲余言湖畔有前明兆域規模宏敞鄉人
將謀鬻之他姓不知爲誰氏之隴意其爲文肅墓郡中文
氏子弟無應試者當是喬木世臣故國故君之感垂爲彝
訓然門祚則自此衰矣所見待詔藏書引首皆用江左二
字長方印或用竺塢印或用停雲圓印其餘藏印曰玉蘭
堂曰辛夷館曰翠竹齋曰梅華屋曰梅溪精舍又有煙條
館一印見天祿琳琅明刻文選又有悟言室一印惟庚寅

吾以降一印臨池用之藏書不常見也又曰漁陽子曰清
白堂壽承印也曰歸來堂曰文水衛人曰肇錫余以嘉名
休承印也曰元珠室曰五峰山人或曰五峰樵客德承印
也德承又有雙玉蘭堂一印亦見天祿琳琅宋刻昌黎集
後以徵明有玉蘭堂故仿爲之曰三楚精神子悱印也曰
石經堂曰兩月平章文肅印也文肅故宅在郡城寶林寺
東有世綸堂圃曰藥圃中有青瑤嶼公讀書處見郡志
又案錢儀吉跋遺山詩集云前後有文嘉休承文彭文揆
賓日諸印又有玉蘭堂圖書記第四冊前葉有十二研齋
及東吳文獻衡山世家印 又案鐵琴銅劍樓書目資治
通鑑文氏藏本有題字云丁亥年九月玉磬山房閱又曰

萬曆丁酉十二月廿三日看畢清涼居士記又曰家中書籍散亡此書幸存萬曆辛丑湘南老人記又曰此書祖父手澤藏於石經堂震孟謹記考錢謙益列朝詩傳待詔築室於舍東曰玉磬山房則第一跋爲衡山筆文肅父爲子悱則清涼居士湘南老人皆其號也昌熾案文文肅墓在竺塢石湖非其兆域也昌熾自隴歸爲亡兒恭彝卜新阡於天池之麓其前卽爲竺塢村人云去一牛鳴地有古墓不知幾何年矣卽往視之石闕尙斜立艸田中題故大學士湘南文公之墓墓前一短碣則題曰明大學士文文肅公墓亡兒地下得侍先賢悲痛之餘竊以私幸始知前所聞於欽韻翁者實非文肅葬地湘南爲文肅之號亦非

子悱今重刊此集不復追改但識其誤於此宣統紀元四月二十一日

靚室含醺坐碧梧彈棋握槊并呼盧卽非左馬班揚業亦作囊中記事珠

錢同愛孔周

文徵明錢孔周墓誌銘君家本溫厚室廬靚深嘉木秀野足以游適肆陳圖籍時時招集奇勝滿座中酒壺列前棋局旁臨握槊呼盧憑陵翔擲含醺賦詩邈然高寄不知古人何如也又云性喜蓄書每餅金懸購所積甚富諸經子史之外山經地志稗官小說無所不有而亦無所不窺尤喜左氏司馬班揚至所不喜雖世指以爲切要而君未始一注目也又云君自宏治辛酉至正德丙子凡六試

應天不售奇窮骯髒迄於不偶 又云君諱同愛字孔周
別號野亭其先江都人五世祖益避亂來吳遂爲長洲人
君子二人鶴徵竹徵生成化乙未卒嘉靖己酉年七十五
昌熾案衡山嘉靖三十八年卒年九十是生於成化庚
寅同愛生乙未又在其後五年 眉公筆記錢孔周喜蓄
書遇有所得隨手劄記積數巨帙文先生極重之寫贈碧
梧高士圖 又妮古錄文選祝京兆跋云余向蓄三五種
亦皆舊刻此錢秀才本尤佳又楊君謙跋孔周得此紙墨
印刻精好倍余所藏豈非天緣耶

草堂寂寞面湖開林界山窩老此才俯仰古今同一慨鄭俞
姓字亦蒿萊 朱良育叔英 元鄭希聖

蘇州府志選舉類吳縣貢生正德年有朱良育叔英又藝
文類朱良育草堂詩集十卷 百宋一廬賦注殘本迂齋
標注崇古文訣有一印文曰吳郡西庵朱未榮書畫印又
有叔榮西庵各一印吾郡明初之藏書者也予嘗欲搜訪
藏書家起元明之交終於所聞見各撰小傳合編一集然
後如叔榮者不致有名氏翳如之歎此好古者之責也

天一閣書目釋氏古詩一冊卷面一長圖書刻吳郡西庵
朱淑英書畫印一方圖書刻山窩林界四字 昌熾案淑
英之淑疑叔誤 楹書隅錄宋本誠齋易傳有鄭希聖題
云鬻書客潘生所售置諸巴焦林中讀書處時至大二年
龍在巳酉端陽日又朱叔英跋云希聖題字在至大巳酉

距今二百八年矣予得之祝希哲希哲得之朱性甫性甫
得之南園俞氏知其爲俞石澗先生家藏也追慕古人感
慨繫之正德十一年丙子有希聖印三家村芭蕉林中散
人吳郡朱未英西崦草堂印各朱記 昌熾案張刻封氏
聞見記有朱良育跋云昔友人唐子畏見借特以不全爲
恨近又於柳大中借鈔前五卷庶幾爲全書古書之難得
如此富室子弟積書萬卷而不讀亦獨何心哉觀此則先
生惜書之癖不減安愚且於唐祝諸公皆有苔岑之契也
豹房昨降五雲箋敕取新聲付管絃但恨生逢楊得意不禁
老作李延年 徐霖子仁 黃琳美之 羅鳳印岡

開有益齋讀書志金陵收藏家徐霖髯仙黃琳蘊眞羅鳳

印岡謝少南與槐並著於時後多散佚惟印岡太守傳至
其元孫燾字原溥與姚澗元白嚴賓子寅俱精鑒賞 松
江府志徐霖字子仁自號九峰道人人或呼爲髯仙 尤
侗詠明史樂府徐髯仙一首自注徐霖在金陵築快園極
游觀聲伎之樂武宗南巡臧賢薦入行宮應制詞曲扈從
還京授官固辭 讀書敏求記隸釋二十七卷杜村先生
手筆雲浦子盛時泰題於後古人於書率多手鈔相傳徐
髯仙有宋槧本甚精妙後歸毛青城載還蜀中前輩好書
風流洵可慕也 式古堂書畫攷米元暉五洲圖有江表
黃琳黃美之黃氏淮東書院圖籍朱記又鄒復雷春消息
圖有黃氏淮東書院圖籍印 千頃堂書目金陵羅氏書

目四卷羅鳳

五嶽歸來憶昔游黃金散盡異書收莫言紫苑醫腸祕鹿甲
題名在虎邱 黃魯曾德之弟省曾勉之 史臣紀載之

列朝詩傳黃省曾字勉之吳縣人弱冠與其兄魯曾散金
購書覃精藝苑王新建講道於越參預講堂作會稽聞道
錄湛元明振鐸成均則又學於元明名王湛兩家之學李
獻吉以詩雄於河洛則又北面稱弟子有五嶽山人集子
姬水字淳父 又黃魯曾字德之正德舉於鄉分宜聞其
名欲招致之不能得也父授產千金悉以置書 昌熾案
郡志選舉魯曾中正德十一年丙子科鄉試 王文恪申
鑒注序吾蘇黃勉之好蓄異書爲之訓釋多得荀悅之旨

式古堂書畫攷趙文敏書畫冊黃姬水跋題丙寅上日
定靈子黃姬水有姬水黃孟二朱記 天祿琳琅明板追
昔游詩集有黃印姬水積山二朱記 昌熾案士禮居題
跋記畫鑒一卷嘉靖乙丑春三月十三日鹿甲居士史臣
紀勘畢甯宋樓所藏陶隱居集亦有史臣紀題字史君字
載之見穰黎館過眼錄其事蹟無攷惟虎邱山有其題名
云隆慶戊辰冬平度崔旦吳郡黃姬水徐調元史臣紀來
游憩此知其爲郡人且與淳父爲友也又從廠肆見莊子
通義有史臣紀書籍五字小楷長木印又案宋史載之以
紫苑醫蔡京腸祕今傳有史載之方與鹿甲居士姓字偶
同故詩辨之

藝菊一畦書滿架自言嗜好別無多如何結得清波恨幾欲

投文告亞駝

袁翼飛卿

姑蘇名賢小紀袁翼字飛卿十歲能爲文稍長益事博綜
奇文祕苑日討尋不厭聞有異書輒奔走求之餅金懸購
至解衣爲質弗惜也正德丙子舉於鄉以母病不赴公車
晚益翫髒深藏不出讀書樹藝自娛而已闢小圃藝菊數
百本嘗曰吾於世萬事可捐惟積書藝菊不能忘情姚
咨清波別志跋予幼業舉子見同儕所讀者皆坊肆糟粕
之文心竊鄙之旣長棄去幡然從事六籍聞風而售者日
至一人稱姑胥袁飛卿家奴肩一篋手一編迺清波別志
也其人視爲奇貨索價太高因持去三十年來求之弗得

今始得之貞山陸給事家前有雜志十二卷後別志三卷
比曩者爲全予喜而執筆日鈔五葉積七十日訖事追惟
袁陸皆吳產也袁以規利陸以結義賢否之分如此宜其
顯晦壽夭亦殊塗云 讀書敏求記博雅十卷正德乙亥
支硎山人手跋云士人袁飛卿有此書求之半載童數十
往返始得繕錄微白金五十星乃去錢物可得書不可得
雖費當勿校耳

山居何有濟時心得一奇編一苦吟若識安愚遺守約豈知

笙磬本同音

柳僉大中

俞弁子容

全祖望柳氏水經校本跋柳大中名僉吳之隱君子也生
當武宗之世所校本經以宋槧手鈔改正錯簡如潁水篇

渠水篇灑水篇皆大有功也 讀書敏求記沈雲卿集二
卷吳門柳氏藏書柳君名僉別號味茶居士摹寫宋本唐
人詩數十種今歸述古書庫 士禮居藏書題跋記錄異
記五代杜光庭所纂正德己卯三月吳門柳僉錄於桐涇
別墅之清遠樓述一章以紀之鈔書與讀書日日愛樓居
窗下滿池水萍間卻餌魚時名隨巧拙天道已盈虛莫信
村居好山居樂有餘俞弁題云己卯首夏訪大中假錄原
韻奉謝生平酷好書僻性厭城居洗杓嘗鴟酒焚芸辟蠹
魚荷君函裏祕益我腹中虛好語田園輩辛勤廿載餘端
陽後二日長洲守約道人俞弁志何焯跋云余生三十五
年但知有安愚不知有守約今讀其詩二老風流可愛昌

熾案安愚亦大中別號 韶宋樓藏書志樂府古題要解
二卷柳氏跋云正德乙亥七月二十二日錄訖以詩寄興
云偶病不粒食鈔書二十番娛生無此癖守死亦爲冤把
筆頭欹帽衣繇酒罷樽時名付流水此外復何言布衣柳
僉 又隨隱漫錄五卷有跋云從柳大中氏借歸錄畢口
占絕句以記之心愛奇編雨汗流山妻笑我不封侯偷閒
八日閒中寫一筆看來直到頭嘉靖丙戌秋守約居士俞
弁志 鐵琴銅劍樓書目刻溪詩話後有題云從柳大中
假錄丁丑六月十七日俞弁子容甫書於紫芝堂中
家本靈威古洞天積書連屋突無煙彭殤雖亦關時命苦恨
應劉未豸年 閻起山秀卿

文徵明閩起山墓誌銘君喜積書見書必力購家惟一童
日走從友人家借所未讀書手鈔口吟窮日夜不休所獲
學俸盡費爲書資家甚貧或時不能炊至質衣以食而玩
其書不忍棄竟以積勞得羸疾 又云閩之先臨江人國
初以事徙隸蘇州衛父銜生君於洞庭山中因名起山而
字秀卿卒年二十四正德丁卯正月乙亥也 列朝詩傳
秀卿著述自二科志以外無傳

雅宜山人王履吉隆池山人彭孔嘉同是文門霞外客論古
更約周公瑕 王寵履吉 彭年孔嘉 周天球公瑕

文徵明王履古墓誌銘君於書無所不窺手寫經書皆一
再過少學於蔡羽先生居洞庭三年旣而讀書石湖之上

二十年非歲時省侍不入城生宏治甲寅十一月八日卒
嘉靖癸巳四月三十日年四十 又云君諱寵字履仁後
更字履吉別號雅宜山人 列朝詩傳寵兄守字履約舉
進士撫治鄖陽而履吉已前死死後數十年履吉名滿天
下人之猶知有履約者以履吉爲之弟也 蘇州府志寵
有越溪莊在石湖上中有采芝堂御風亭小隱閣 又彭
年字孔嘉父昉正德辛未進士年性穎異嗜讀書詩宗盛
唐旁及香山郢州精法書宗顏歐以貧死 又周天球字
公瑕太倉人年十六隨父徙吳從文徵明游善大小篆古
隸行楷一時豐碑大碣皆出其手 愛日精廬藏書志游
志續編有錢叔寶跋云辛酉九月望過孔嘉雲光閣見此

本袖歸錄之以爲齋中臥游之玩 士禮居藏書題跋記
和靖先生詩有彭年跋云此集爲匏庵相國所藏標題尙
公手跡也嘉靖戊申春禮部陸君購得之以遺余隆池山
樵彭年書於寒綠堂 式古堂書畫攷趙子固墨蘭圖有
羣玉山樵六止居士印 昌熾案滂喜齋藏宋刻雲齋廣
錄有王履吉印鍊研齋二朱記又宋刻東觀餘論元本楊
子法言並有古吳王氏王履吉印與竺塢玉蘭堂翠竹齋
梅溪精舍五峰樵客文氏諸印雜廁不分當是雅宜遺書
身後盡歸竺塢余在菰里瞿氏所見兩家藏本亦如此也
滂喜潘氏又有宋刻淮海居士長短句明吳文定文壽承
周天球皆有藏印

文房遠在白雲間欲往從之不可攀但聽道旁樵父說顧家
門外有青山 顧仁效 顧元慶大有

王文恪鑿陽山草堂記顧仁效結廬陽山之下棄去舉子
業獨好吟咏兼工繪事坐對陽山拄頰搜句日不厭或起
作山水人物悠然自得人無知者 天祿琳琅資治通鑑
綱目明顧仁效藏本有靜學文房之印 鐵琴銅劍樓書
目春秋經傳集解宋刊本有彥先顧仁效二朱記 楹書
隅錄宋本禮部韻略每冊有南京兵馬指揮司副指揮關
防夾山人書畫印長洲顧仁效水東館攷藏圖籍私印各
印 甯宋樓藏書志通鑑殘本有顧仁效水東館攷藏圖
籍之印 王穉登顧大有先生墓誌顧元慶字大有吳之

長洲人家陽山大石下學者稱之曰大石先生 列朝詩
傳元慶家澣市兄弟多蟻齋治產山人獨以圖書自娛所
居曰顧家青山在大石左麓山中有勝蹟皆自爲之記名
其堂曰夷白藏書萬卷擇其善本刻之署曰陽山顧氏文
房王伯穀往訪之年七十五猶吟對不倦 俞仲蔚顧山
人元慶大石山居詩白髮無王事門當大石山雲霞樓棟
裏歌賦向人閒谷口聽琴至松根拾菌還客留唯茗椀日
覺古心閒 士禮居藏書題跋記開元遺事陽山顧氏藏
本顧名元慶在吳中爲藏書前輩 又宋刻本新序陽山
顧大有所藏 平津館鑒藏書籍記元刻范文正遺跡有
大石山人印吳郡顧元慶珍藏印 昌熾案元慶刊有文

房小說四十二種又刻明朝四十家小說中瘞鶴銘攷卽
元慶著又著山房清事一卷十友圖贊一卷茶譜一卷刻
入格致叢書雲林遺事一卷大石山房石友譜一卷夷白
齋詩話一卷陽山新錄一卷刻入梓吳據王百穀墓誌其
所撰又有簷暴偶談一卷紫府奇言一卷雲拊新編三卷
消暑珠一卷大石八景記一卷

江左清談擅籍咸選樓更繫五臣銜兩書已足沾來學九百
虞初大可芟 袁襲尙之

王世貞袁魯望墓誌銘君祖鼎生四子曰表曰襲曰褒其
最少者曰胥臺公表與其伯父之子袞袞皆用文章顯名
吳中時人目之曰汝南六俊胥臺公實生君名以尊尼而

字之曰魯望 蘇州府志表字邦正臨江通判裴字尚之
吳縣學生晚耕謝湖之上自號謝湖褒字與之太學生晚
築室桃花塢抱膝長吟於聲勢泊如也表字牙之嘉靖乙
酉舉鄉試第一明年成進士袞字補之嘉靖戊戌進士袞
字紹之吳縣學生 昌熾案謝湖所刻有六臣本文選世
說新語四十家小說後四十家小說廣四十家小說列朝
詩傳云裴累試不利壹意汲古家有石磬齋蔡九達爲之
記甯宋樓藏書志傷寒總病論十卷有袁氏尙之朱文方
印玉韻齋圖書朱文長印式古堂書畫攷趙子固墨蘭圖
袁褰題詩後有謝湖采碧亭研北閒情高山流水四印天
祿琳琅文選袁氏昌安堂珍藏有與之父鏡機子朱記

磐石山樵西舜城侍兒開閣不勝情奇書到手輕蠻素桃葉
何人打槳迎 朱承爵子儋

無聲詩史朱承爵字子儋號舜城漫士又號左庵江陰人
文徵仲稱其爲文古雅有思致 讀書敏求記阮嗣宗詠
懷詩行世本惟五言八十首朱子儋取家藏舊本刊於存
餘堂多四言十三首覽者勿漫視之 士禮居藏書題跋
記魚元機集宋本朱子儋藏子儋江陰人世傳有以愛妾
換宋刻漢書事亦好事之尤者 天祿琳琅宋刻文選有
朱印子儋存餘堂印二朱記 又續編羣經音辨有朱子
儋印行素齋圖書記左庵集瑞齋磐石山樵西舜城居士
各朱記 鐵琴銅劍樓書目離騷集傳末葉有舜城朱承

爵校讐訖一行卷首有舜城居士子儋朱記 式古堂書畫攷張來儀懷友書畫合卷後有一行云嘉靖壬午存餘堂重裝下鈐朱氏子儋左庵二朱記 昌熾案子儋始末未詳壬午爲嘉靖元年文徵仲尙及見其爲文是其人當生正德前袁褫之少弟表舉嘉靖四年乙酉鄉試秦沐二妙集跋吾友顧仁效過訪云云雖在嘉靖十五年丙申然王文恪爲作記是丙申至錫山時其齒已宿皆正德間人也故以子儋與仁效褫皆次於正德之末嘉靖之前

潦倒書淫墨癖中滑稽世乃有人翁紫清舊宅歸來日元祐

圖書一旦空

豐坊存禮

列朝詩傳豐坊字存禮鄞縣人嘉靖進士除吏部主事以

吏議免官居吳中貧病以死張司馬時徹序其集曰片語合意輒出肺肝相啗睚眦蒙瞶卽援戈矛相刺亦或譽嫫母爲嬋妍斥蘭苳爲蕢菘知者以爲激詭不知者以爲窮奇也 昌熾案坊字存禮改名道生嘉靖癸未進士除禮部主事非吏部也附見明史豐熙傳然據下天官大夫印梨洲考功云云又似官吏部未詳 黃宗羲豐南禺別傳豐坊更名道生字人翁別號南禺外史讀書注目而視瞳子嘗墮眶外半寸人有出其左右不知也自考功遷謫失職而歸書淫墨癖無所不知亦遂目空今古滑稽玩世洗洋自恣而已 全祖望天一閣藏書記豐氏爲清敏公之裔清敏之子安常安常子治監倉揚州死於金難治子誼

官吏部以文名誼子有俊以講學與象山慈湖善有俊子雲昭雲昭子稌稌子昌傳並以學行爲時師表而雲昭羣從曰芑蒞皆有名蓋萬卷樓之儲實自元祐以來啟之自吏部以來遷居紹興其後至庚六遷居奉化庚子茂四遷居定海茂孫寅初明建文中官教諭寅初子慶瞻念先疇歸葬父於鄞城西大卿橋以南紫清觀紫清觀者宋豐尙書故園也以其餘治宅於是元祐以來之圖書由甬上而紹興而奉化而定海者復歸甬上慶官河南布政子耘耘子熙官學士卽以諫大禮拜杖遣戍者也豐氏自清敏後代有聞人故其聚書之多亦莫與比迨熙子道生晚得心疾潦倒於書淫墨癖之中喪失其家殆盡而樓上之書凡

宋槧與寫本爲門生輩竊去者幾十之六其後又遭大火所存無幾范侍郎欽素好藏書至是以其幸存之餘歸於是閣 又云道生自以家有儲書故謬作河圖石本魯詩石本大學石本則以爲清敏得之祕府謬作朝鮮尙書日本尙書則以爲慶得之譯館貽笑儒林欺罔後學皆此萬卷書爲之厲也 式古堂書畫攷豐南禺臨養生論有清敏公家發解出身南禺外史三朱記又跋後有四明人翁天官大夫三印 又登瑞石山詩帖有豐氏人季印 稚子迎門婦下機庭前七檜是耶非空山猿鶴休相訝爲戀殘書解組歸 楊儀夢羽

龔立本常熟志楊集字浩然景泰甲戌進士安州知州子

觴成化丁酉舉人莒州知州觴子儀字夢羽嘉靖五年進士山東副使移病家居惟以讀書著述爲事構萬卷樓聚書其中多宋元本蘇州府志楊副使儀宅在迎恩橋東北有萬卷樓松窗快筆楊夢羽初歸詞曰萬卷樓前百花徑裏年來草色荒蕪天涯客子歸夢久模餽猿鶴驚猜已甚故山遂千里歸途念少日煙霞色相落魄帶經鉏其下闕云人生何自苦風波險惡歲月奔徂笑候門稚子驚問征夫惟有下機山婦應私訝貧似當初覽囊中虎符龍敕猶恐事虛無士禮居藏書題跋記珩璜新論舊藏七檜山房鈔本立齋相國手校七檜山房海虞楊夢羽書齋名也其藏書所曰萬卷樓人所共知七檜山房則罕知矣

式古堂書畫攷松雪淵明象楊夢羽題有華陰世家印昌熾案夢羽一號五川

整齊舊聞汲放失左右文武儒稗編好屬女孫收脚本一
圈一擲莫忘筌唐順之應德孫宇昭孔明唐仁良士

明史唐順之傳順之治貫羣籍年三十二舉嘉靖八年會試第一改庶吉士調兵部主事盡取古今載籍剖裂補綴區分部居爲左右文武儒稗六編行於世以禦倭擢右僉都御史代李遂爲鳳陽巡撫三十九年卒年五十四崇禎中追諡襄文子鶴徵隆慶五年進士亦以博學聞吳偉業汲古閣歌嘉隆以後藏書家天下毘陵與琅邪整齊舊聞汲放失後來好事知誰及彭文勤公知聖道齋讀書

跋余見季滄葦所藏正德年初印盡忠錄尚無補錄二卷
有滄葦手跋其夫人唐氏乃毘陵孔明父之女荆川四世
孫也以是見貽朱墨皆荆川筆云細閱書中絕無批評但
有圈抹不能得其讀書之意既取荆川右編勘之圈者皆
入右編抹者節去始知卽其纂右編時脚本滄葦之言益
信 拜經樓藏書題跋記唐字昭字孔明家富藏書毛斧
季嘗聞其有宋槧趙孟奎分類唐詩一百卷輾轉借之而
未得 天祿琳琅續編宋刻孝經有唐字朱文圓印又晉
昌祕笈記唐仁良士毘陵唐良士藏書四印 楹書隅錄
北宋本孟東野集有毘陵唐良士藏書于辰良士三印
雲煙已逐邊劉散又自江南到濟南積劫微塵應悟徹本來

禪誦及瞿曇

李開先伯華

明詩綜小傳李開先字伯華章邱人嘉靖己丑進士
部主事歷太常少卿提督四夷館罷歸有閒居集錢受之
云伯華罷歸治田產蓄聲伎徵歌度曲自詡馬東籬張小
山無以過也 靜志居詩話中麓最爲好事藏書之富甲
於齊東詩所云豈但三車富還過萬卷餘又云借鈔先館
閣博覽及瞿曇是也先時邊尙書華泉劉太常西橋亦好
收書邊家失火劉氏散佚無遺獨中麓所儲百餘年無恙
近徐尙書原一購得其半予嘗借觀籤帙必精研朱點勘
北方學者能得斯趣殆無多人也聞中麓後人尙餘殘書
數十部巡撫丹徒張公物色之中有陸農師禮象一篇張

公歿後訪之不能得矣 王文簡跋山谷精華錄予與中麓爲鄉里後進曾購其藏書目錄累年不可得僅於京師慈仁寺得小冊西漢文鑑朱印宛然後聞其書盡捆載歸崑山徐司寇矣康熙戊寅司寇次子章仲爲工部郎中以宋槧本山谷精華錄八卷見貽視其卷首卽中麓印記在焉此書藏濟南李氏二百年而歸於江南又十餘年而復歸濟南似亦有數焉 昌熾案翁覃溪題王文簡載書圖十部唐籤未備觀精華山谷輯來難自注先生所見精華錄乃明人僞本 讀書敏求記斧季從輦下還解裝出書二百餘帙皆祕本也近代藏書家推章邱李氏金陵焦氏灰劫之餘未知金陵圖籍猶有存焉否今斧季所購乃中

麓祕藏之物也 何焯孟子音義跋孟子篇敘自世綵堂以下諸刻皆闕毛丈斧季爲東海司寇購得章邱李中麓少卿所藏北宋本乃有之

煙波四面閣玲瓏第一登臨是太沖玉几金峨無恙在買舟欲訪甬句東 范欽堯卿 從子大澈子宣

明詩綜小傳范欽字堯卿一字安卿鄞縣人嘉靖壬辰進士累官兵部右侍郎有天一閣集 茶餘客話欽號東明喜購舊本兩浙藏書以天一閣爲第一 全祖望天一閣藏書記天一閣肇始於明嘉靖間而閣中之書不自嘉靖始固城西豐氏萬卷樓舊物也豐道生晚得心疾樓上之書爲門生輩竊去又遭大火所存無幾范侍郎欽素好購

書先時嘗從道生鈔書且求其作藏書記至是以其幸存之餘歸於是閣又稍從弇州互鈔以增益之雖未能復豐氏之舊然亦雄視浙東焉吾聞侍郎二子方析產時以爲書不可分乃別出萬金欲書者受書否則受金其次子欣然受金而去今金已盡而書尙存其優劣何如也 又天一閣碑日記是閣之書明人無過而問者康熙初黃先生太沖始破例登之於是崑山徐尙書健庵聞而來鈔其後登斯閣者萬徵君季野馮處士南耕而海甯陳詹事廣陵纂賦彙亦嘗求之閣中 又云閣之初建也鑿一池於其下環植竹木然尙未署名也及搜碑版忽得吳道士龍虎山天一池石刻元揭文安公所書而有記於其陰大喜以

爲適與是閣鑿池之意相合因卽移以名閣 東齋脞語 范氏立法盡善其書不借人不出閣子孫有志者就閣讀之故無散佚之患其閣四面皆水讀者不許夜登不嗜煙艸故永無火厄迄今三百年雖十七四五然所存尙可觀也 阮文達天一閣書目序此閣構於月湖之西宅之東牆圃周迴林木蔭翳閣前略有池石與闐闐相遠寬閒靜闕不使持煙火者入其中其能久一也司馬歿後封閉甚嚴繼乃子孫相約爲例凡閣廚鎖鑰分房掌之禁以書下閣梯非各房子孫齊至不開鎖子孫無故開門入閣者罰不與祭三次私領親友入閣及擅開廚者罰不與祭一年擅將書借出者罰不與祭三年因而典鬻者逐不與祭其

例嚴密如此所以能久二也 又定香亭筆談云余兩登此閣閣不甚大地甚卑溼而列置書乾燥無蠹蝕是可異也 昌熾案吾友王勝之同年云書乾燥不蝕由置芸葉石英之故詳隨園集登天一閣詩注 鄭梁訥庵范公傳訥庵范公諱大澈字子宣又字子靜從仲父兵部右侍郎欽游京師官鴻臚寺序班使琉球遼東朝鮮等處璽書七下進秩二品月俸所入輒以聚書聞人有鈔本多方借之長安旅中嘗雇善書者謄寫多至二三十人年六十七致仕築室郡城西郊繙經閱史品畫評書者垂二十年萬曆庚戌九月八日卒春秋八十有七所著有灌園叢談臥雲山房遺藁 又爲陳怡庭壽范簡巖七十序鄞邑好古藏

書之家豐氏而後推范氏然人知司馬東明公之所藏特富而不知鴻臚訥庵公爲其猶子其所藏不止如南北阮也百餘年以來故家阜隸華屋山邱司馬天一閣之書名天下然至論其籤題裝輯奕世如新則鴻臚手澤擬諸司馬正如石崇之於王愷矣 昌熾案天一閣書目所列范氏諸印有四明范氏書記甬東范氏家藏圖書古司馬氏萬古同心之學東明山人東明草堂七十二峰一吾廬和鳴國家之盛司馬印也范子受氏靜思齋崑崙山人西郭草堂范伯子子受少明清甯宇宙中人皆司馬之子少明印也 又案天祿琳琅初學記有范大澈印子宣父西園生平樂事滄洲外史藝文類聚有范氏子宣明州范生臥

雲寶墨齋四明真逸南海釣者典屬國印典客侍從之臣
句章灌園叟對此展玩咀嚼自謂葛天之民金峨玉几丹
山赤水諸朱記皆子宣印也丹山赤水爲剡源之第五曲
亦名三石邨全謝山湖語所云獨剡源之五曲忽孕爲丹
霞之古文迅流成雷來歸於三石之邨是其地矣

藏書紀事詩卷二終

